


五



文苑英華卷第六百四十一

狀十四

進貢中



降誕日進物狀十五首

進農書狀一首

進碑文狀二首

進詩狀一首

進新舊文十卷狀一首

進畫馬屏風狀一首

進東封圖狀一首

進西北邊圖經狀一首

進哀冊文狀二首

降誕日進光明砂等狀二首

呂頌

右臣伏以大電遶樞千年感聖神光照室六合歸尊恭惟
降誕之辰是啓乾坤之祚普天稱慶率土同歡仰舜日而
徘徊望堯雲而忭躍前件光明砂等金丹上品著在仙經

願因一作延不朽之姿永固長生之壽

二

右臣伏以上玄降聖之時皇帝出震之日天垂景曜遶北斗以呈祥人竭歡心願南山而為壽前件光明砂丹石等管内所出服餌所尚生依山谷誠有驗於仙方貢自蠻夷幸得充於御府臣藩守有限不獲稱慶闕庭

降誕日進物狀

裴次元

右臣伏以搖光之祥貫月於佳夕遶樞之感降聖於良辰歡浹寰瀛慶延寶祚百靈効祉固增壽於南山萬國一心皆貢珍於北闕臣謬膺庶問分鎮甌閩當朝案之稱觴身居遐遠望長安而瞻日戀積心魂前件女口及銀器衣箱

等稽禹貢之文敢遵任土比野芥疑作芹之獻空願竭心冀

因此而展誠豈以菲而廢禮輕瀆旒宸殞越伏深

降誕日進馬及織成紅綿地衣狀 于邵

右臣伏以今月十九日陛下降誕之辰萬國駿奔二儀交

泰玉帛方陳於闕下慶抃實匝於寰中臣謬荷殊恩思登

壽域伏以馬則雄姿未織此句疑誠謝於權竒織成乃異於

案箱宜或存於煥爛懿茲致遠之用宜秉含章之資憑物

遵疑誠感恩祝聖所獻雖慙於萬國均情實邁於等夷臣

不勝懇悃之至

為京兆李尹降誕日進衣狀 劉禹錫

衣一副四事 云右伏以德水方清真龍下降天長地久

瞻北極而常尊獻壽稱觴配南山之集作未固臣地叨集

居宗屬職忝尹京慶賀之誠倍萬常品前件衣服謹詣銀

臺門奉進輕瀆旒宸伏用兢惕集作

降誕日進銀器物及零陵香等狀 令狐楚

右伏以千年元命之符四月正陽之氣出震吉日繼乾良

辰黃河再清冠中古之表德恒星不見掩西方之誕聖前

件器物或堅白無玷或馨香有聞敢同率土之心以續如

天之壽千冒宸宸伏增戰越

降誕日進鞍馬等狀四首 前人

右臣伏以繞樞之電曾委瑞於軒皇照室之光昔呈祥於

漢后伏惟皇帝陛下貴從天下明在日中當四月之正陽

三千年之聖運人神叶慶朝野同歡臣任重戎旃路遙天

闕懽呼萬歲如聞山嶽之聲傾竭一心庶均葵藿之志前

件馬等誠非珎異頗似柔馴千冒宸嚴伏增戰越

二

右伏以月惟首夏氣叶正陽一人慶誕之辰萬國樂康之

日臣某屬連枝葉守在邊陲觀河水之既清知冬松之盛

一作益茂前件馬弁鞍轡等安其馴教考以精誠敢緣九族

之恩願續萬年之壽千冒宸宸無任戰越

三

右臣伏以太電繞樞之辰普天咸慶神光照室之夜匝地

同歡臣限守邊陲未朝雲闕尚想河清之色如聞里社之

聲前件馬鞍等又似柔馴皆經考教任土作貢慙述職於
微臣如日之昇願並明於聖主干冒陳獻伏增戰越

四

右臣伏以里社旣鳴斗樞爰電誕生元聖允叶純陽實萬
國同歡之時而千齡兆慶之日臣某限從邊後違奉天慈
飲河每挹於清瀾向闕遙瞻於紫氣前件鞍馬等駿非金
骨麗之錦韉慙無照地之光願獻呼嵩一作山之壽干冒陳
獻伏增戰越

降誕日爲楊大夫奏修功德并進馬狀 前人

右臣伏以居至道之尊其唯元命助無疆之祚亦在勝因
是以千年爲慶誕之期百福有莊嚴之義伏惟皇帝陛下

以文武道爲天人師降生於純陽之月續承于大寶之位
効祉而四天奔走流權而萬國謳歌臣某職在鑒司土無
珍異恨無以拜上玄之慶酬厚載之仁敢伏普通轉修經
戒仰申誠懇以就有爲之功上爲聖神庶資無量之壽其
馬久令教習頗似柔馴願承內廐之恩以備屬車之駕干
冒塵瀆不任戰汗之至

降誕日進器物狀四首

王仲周

石伏以執氣牧人運歸聖德天臨日照慶集嘉辰瞻太極
之肇分仰濛汜之初浴歡忻感戴踴躍屏營臣限守方隅
不獲稱賀上件銀器等隨伏奉進

二

右伏以紫氣充庭黃河變色用符昌運式表誕彌雖聖壽
齊天不假封人之祝而獻芹爲禮空馳野老之誠上件銀
器綿錦綾綺等謹遣某官隨狀奉進

三

右伏以厥日誕祥惟天降聖歡連率土慶集茲辰前件器
物雖竭愚誠欲申上獻顧惟簡薄難備下陳伏以陛下勤
恤爲心慈儉成德是用恭行聖旨爲禮不寶遠物爲玆臣
限以跼守遐藩不獲申慶天闕竊同織草長傾向日之誠
願比封人遠獻如山之壽無任戀慕歡躍之至

四

右伏以四月孟夏千年聖期社鳴表祥河清叶慶臣於是

日限守列藩不獲望南山以獻觴聞擊石以率舞屏營戀
慕不知所裁上件品物等謹遣某官隨狀奉獻

進農書狀

柳宗元

農書三卷

右伏奉某月日制

集作勅

宜以三月一日爲中和

節所司進農書永爲恒式者臣伏以平秩東作虞書立制
倣載南畝周雅垂文此皆奉天時以授人盡地利而豐食
自陛下惟新令節益勵農功旣立典於可傳每陳書而作
則耕鑿之力敷帝力於嘉謨稼穡之艱動天心於睿覽集作
鑿勤勞率下超邁古先凡在率土不勝幸甚前件農書謹
函封進謹奏

進田弘正碑文狀

元稹

田弘正魏博德政碑文右前件碑文伏蒙御札朱書遣臣撰述恩生望外事出宸衷銘鏤骨肌難酬雨露

臣伏以陛下所以令臣與弘正立碑蓋欲遣魏博及鎮州將吏等並知弘正首懷忠義以致功勳臣若苟務文章廣徵經典非惟將吏不會亦恐弘正未詳雖臨四達之衢難掩萬人之口臣所以効馬遷史體叙事直書約李斯碑文勒銘稱制使弘正見銘而戒逸將吏觀叙而愛心不隱實功不爲溢美文雖朴野事頗彰明伏乞天慈特留宸鑒其碑文謹隨狀封進謹具奏聞伏聽勅旨

進幽州紀聖功碑文狀

李德裕

奉宣令臣撰述者伏以北狄悍勇於四夷前代聖王莫能

制伏昨者迴鶻雖乘危感勢已內侵豺狼之師尚餘十萬陛下神武雄斷智出無方震天威以霆聲碎獯戎而瓦解武功盛烈高視百王豈比周穆犬戎之征荒服不至漢武馬邑之詐群帥無功將垂耿光宜命鴻筆臣學慚集作荒

淺久病衰羸

集作殘

紀軒后之功徒知竭思叙唐堯之德終

愧難名採其功狀稍似撫實今已撰訖謹連進上輕瀆宸

嚴集作

不任惶越謹錄奏聞

進詩狀

元稹

臣某雜詩十卷右臣面奉聖旨令臣寫錄一雜詩進來者伏惟皇帝陛下學深江海文動星辰乙夜觀書秋風賦詠微臣入院之始學士等盛傳陛下親批賀雨一章體備鸞鳳

思深集作珠玉臣雖不得目覩宸翰臣實竊得心念聖言

既仰燭龍之光難逞聚螢之照欲為陳獻益自慚惶况臣

九歲學詩少經貧賤十年謫官備極恓惶凡所為文多因

感激故自古風詩至今樂府稍存寄興頗近謳謠雖無作

者或風粗中道人之採自律詩一百韻至於兩韻七言或

因朋友戲投或因悲歡集作或以悲傷自遣既無六義皆出一時

詞旨繁蕪倍增慚恐今謹隨狀陳進集作進呈無任戰汗屏營

之至

進新舊文十卷狀

李德裕

四月二十三日奉宣令臣進來者伏以楊雄云童子雕蟲

篆刻壯夫不為臣往在弱齡即好詞賦情性集作情性所作

老不志屬吏職歲深文業多廢意之所感時乃成章豈謂

擊壤庸音謬入帝堯之聽巴渝末曲復蒙漢祖之知跼蹐

慙惶神魂飛越謹錄新舊文十卷進上輕瀆宸嚴無任兢

惕

代李尚書進畫馬屏風狀

李翱集無

右臣近得前件馬樣以其圖寫諸家稍殊試為短屏備以

文彩觀其體閑色浮氣逸神駿練影吳浦指山川而不搖

花攢上林若雨露之新洗或屈膝千里或長鳴九霄昔以

負圖為寶今願捍蔽成功形影不殊効用何別謹裁成十

二扇隨狀奉進若以時從啓閉猶足靖於埃塵儻將用以

驅馳庶可效其筋力輒敢輕冒戰懼伏深

爲裴相公進東封圖狀

劉禹錫 見集本

集賢殿御書院開元東封圖一面右臣謹按開元十三年
玄宗皇帝以天下太平登封東岳聲名文物振耀古今伏
惟陛下丕承耿光再闡鴻業祖宗盛事紹復有期臣所以
寫成此圖輒敢上獻至於繪畫躬自指搗徵史氏之文纂
禮容之要山川氣象悉擬真形羽衛威儀咸稽故實所冀
睿情一覽遐想玄蹤臣叨榮過深抱疾已久望陛下告成
之日心必前知嗟老臣將謝之年身恐不見疲羸之際感
激倍深前件圖差某官乙謹詣光順門奉進謹奏

進西北邊圖經狀

元稹

京西京北圖經四卷右臣今月二日進京西北圖一面山

川險易細大無遺循慮幅尺高低閱覽有煩於睿鑒屋壁
施設俯仰頗勞於聖躬尋於古今圖籍之中纂撰京西京
北圖經共成四卷所冀衽席之上欹枕而郡邑可觀遊幸
之時倚馬而山川盡在又太和公主下嫁伏恐聖慮念其
道遠臣今具錄天德城已北至迴鶻衙帳已來食宿井泉
附於圖經之內并別寫一本與圖經序謹同封進其圖四
卷隨狀進呈

進憲宗哀冊文狀

令狐楚

右奉勅令臣撰者臣今撰了謹連如後竊以揚先帝無疆
之德薦陛下罔極之恩宜擇能者永垂不朽聖意以臣備
位相府策名文場忘其庸虛賜以撰述頃自哀迷重疊心

緒摧落雖磨鉛雕朽已竭其精誠捧日窺天難窮其高遠
干冒封進無任悲躍屏營之至

進貞懿皇后哀冊文狀

常袞

右奉進旨令臣撰詞訖謹隨狀封進伏以纂述坤儀弘宣
聖悼禮有追冊文以叙哀前代以來舊章不易屬詞之重
高選文臣晉之恭后則王彪之顏延年咸製其詞哀華者
稱至貞觀中文德皇后遷座特詔虞世南撰述編於文館
永播徽音此二臣者皆以鴻藻奮於一時用能紀皇壺之
風煥青史之簡臣才學甚淺典策非工承詔兢悚匪惶夙
夜伏自循省叨竊至深陛下往命貴妃追封殊號冊蓋之
令皆臣奉行德範柔明多所遺闕浪思鄙薄于今愧報况

又獲承慈旨重紀芳猷雖竭庸虛慚無麗藻屬文明天下
多士盈朝顧其式瞻何以昭示具嚴上獻益用兢惶無任
戰懼之至

文苑英華卷第六百四十一

文苑英華卷第六百四十二

狀十五

進貢下

進金花銀櫻桃籠等狀一首

進白蕉狀一首

進娑羅樹枝狀一首

進古銅器狀一首

進金盞并甕子狀一首

進瓷器狀一首

進馬狀一首

進異馬駒狀一首

進自兔狀二首

進鷹狀三首

進雙鷄狀一首

進白雀狀一首

進金花銀櫻桃籠等狀

令狐楚

右伏以首夏清和含桃香熟每聞採顧湏有提携以其鮮

紅宜此潔白前件銀籠并煎茶具慶等羨餘舊物銷鍊新
成願承薦寢之羞敢効梯山之獻其通犀璫瑁上藥等買
並依價採皆及時誠非珍竒恐要聚蓄勤奉丹款不敢不
進

進白蕉狀

前人

右伏以半夏欲生正陽初王將勝時熱在新其衣前件白
蕉先時織成依價市得光雖讓雪踈不礙風願充當暑之
服爰申任土之貢干冒宸聰無任戰汗

進娑羅樹枝狀

張謂

右所管四鎮境天竺山壓枝一作園國有拔汗那最為密
近乃一作有娑羅樹特稱竒絕不庇凡草不棲惡禽一作

無慚於松柏一作成陰不愧於桃李但以生非得地譽絕

因人榮枯長在於異方委棄不聞於中土陛下高視三代
橫制四夷威信浹於君長仁惠沾於草木前件樹枝臣去
載已進訖臣伏以凡遵播殖貴以滋多今屬陽和之時願
助生成之德近差官於拔汗那計會又採前件樹枝二百
莖並堪進奉如得託根長樂擢穎建章布葉垂柯一作
非月中之丹桂連枝接影對天上之白榆於物無遺在人
知感謹差軍將李洎押領赴京

賀衢州進古銅器狀

張九齡

右伏見衢州所進瑞魚銘等神物環竒形製純古魚為龍
象既章受命之元銘作龜文更表錫年之永河圖舊事無

以加之臣升集作贊休明屢承福應恭惟拜慶倍百恒情
伏望宣付史館傳之不朽無任喜躍之至

進貢扶風縣平地穿得金盞二枚并甕子一枚狀

于公異

右臣得所由狀送前件物至臣所者輒令瑩拭非是常珍
宜在昇聞輒敢上獻陰陽造化神妙潛功群生旣偶於昌
期靈貺豈私於聖德伏惟皇帝陛下化通玄默躬贊昇平
神功所以服不庭大孝所以尊清廟故夫惟儲慶雲物表
瑞於非煙地不韜珍宝玉騰光於內府陛下方弘至道爰
紀殊祥仰聖德而彌高在天心而難讓至如此寶安敢無
言觀其形製標奇非一時之物精輝旁射逾百鍊之珍臣

輒比擬他金光芒獨映求之故事未或前聞表孝通誠美
已彰於盈缶徵神錄異慶常美於化鈞况其賦質堅剛銷
形盡竅膺大雅獻酬之用告太平歡樂之符時佇休明潛
躍久同於瓦礫道合交泰成器堪佐於罇壘况因封管而
生似表微衷而獲儻從殊貨是更褒揚必取類於金堅至
遂成於家寶期於銘刻傳在子孫長承聖主之恩使効微
臣之節

代人進甕器狀

柳宗元

甕器若
干事

右件甕器等並藝精埴埴制合規模稟至德之陶
蒸自無苦窳合太和以融結克保堅貞且無瓦釜之鳴是
稱土礪之德器慚瑚璉貢異器丹旣尚質而爲先宜當無

而有用謹遣某官某乙隨狀奉進謹奏

進馬狀

元楨

同州防禦使供進烏馬一疋八歲堪打毬及獵右臣竊聞
道路相傳車駕欲覽遊幸温湯未知虛實者臣職居守土
侍從無由集作因羨魏闕之埃塵猶隨日御恨新豐之鷄犬
亦聽車音目斷魂消形留神往幸又得進奏官狀知河中
華州京兆府並於昭應排比進獻臣當州素乏所出無以
粗展丹誠臣既別受恩私又不合獨無壤莫伏以前件馬
北方正色東道竒蹤調習多時備諳材力集作色解擊毬者
每嘉其環回斗轉動可集作必愜心善獵射者皆歎其度壑
踰溝走不換足欲隨正至獻賀竊慮群衆混同徘徊顧瞻

昔銜斯久今者宸遊近甸地降靈泉施展是時戢藏何益
伏望陛下揚鞭頓轡取驗其馴良結尾絡頭試觀其神彩
臣某深恩未報愚志空存自慚駕鈍之姿莫展驅馳之効
捫心戀主因馬喻身輕冒天威無任戰汗其馬謹隨狀進
謹進

進異馬駒狀

令狐楚

右臣得征馬使穆材狀謹具毛色如前者臣伏以行地之
用莫神於馬擅華名者則衆効竒質者甚稀伏惟陛下廣
大際天高明配日殊祥競發休杜荐臻前件馬稟天駟之
精體坤元之德毛拳惟細鬣赤而高尾掉肉而蜿螭額帶
星而倜儻臣謹差虞侯辛峻專往覆覘俱如前列峻云雙

曠有耀四蹄如削宛然天產定是龍媒允協建午之辰光
昭太一之貺臣見今就太原府養調旬月稍任行步即專
陳獻謹差某官聞奏

為太原李說尚書進白兔狀

前篇作表非

前人

貞元十二年

右臣得嵐州刺史趙挺六月二十九日狀稱嵐州合河縣
太平鄉大慶村收獲前件白兔差行官李希林送到者臣
謹按瑞應圖曰白兔壽千年滿伍百則色白又曰王者恩
加蒼老則白兔見臣伏以白為正色兔實仁獸來皆有為
前篇作應出必以時伏惟陛下聖壽無疆神功不宰是故太陰
精魄降以為瑞皓質玉立素毛霜垂清明不讓於殷狼皎
潔可齊於周鹿况村為大慶鄉號太平無為而成不索而

獲協元符之一氣彰皇德於千齡雖標中瑞之科實應太

廟之曲

前篇作典

臣忝守藩

前篇作方

鎮觀茲休祥無任忭躍歡慶

之至

此篇六百十二卷表門重出前已削去

同前

前人

右貞元十二年六月嵐州刺史於州界太平鄉獲白兔一
隻臣已并圖進獻一作斃於中路惜其誕生靈質不達明
達誠意所求禎祥荐至今又得狀宜芳縣孝義鄉百姓王
貞收得前件白兔送到者臣謹按瑞應圖云王者仁及鳥
獸則白兔見臣伏以兔之為獸最校者多獸之有毛龐雜
者衆臣觀前件兔皓然養素恬爾守柔處群萃以自殊抱

貞明而不汙皎如疊雪燦若凝霜克生孝義之鄉實表中
和之化伏惟皇帝陛下恩覃動物澤及毛群方弘三畝之
仁果應千齡之瑞若非上天慈惠下土清平則安得四年
之中再見其地信可以摘皇上之懿德薦臣子之明誠昭
彰可徵盼矚如荅臣覩茲潔朗宛在封疆踴躍欣歡實陪
恒品謹遣某官并圖隨狀奉進

爲易定張令公進鷹籠狀

鄭綱

右件鷹臣去秋來頻令入草一一揀擇皆有所能試其搏
擊下韜必中伏以上圍五方固多殊異之選下土一物實
表臣子之誠敢望備羽獵於長楊從蒐狩於天仗輕瀆
宸無任屏營之至

進白鷹狀

張謂

右臣管内大小鷹娑羅山採得前件鷹簡擇並堪進奉特
稟異氣挺生殊姿頭圓頂平臆潤脰短丹目時轉志凌雲
霄花毛始齊色靜霜雪旣拔竒而賞異實超等而殊倫但
四鎮川原千里砂磧草木旣少禽獸亦稀礪志疑瓜距調
其羽翮徒有願於擊搏竟無階於効用今寒風凜冽殺氣
嚴凝萬乘時巡六龍冬狩出樊籠之地登校獵之塲必能
隨人指蹤驅御苑之狐兔順時行令逐禁林之鳥雀物性
有適天心所知

進異鷹狀

今狐楚

右臣所管採捕得前件鷹兩翅齊肩雙翎對雙雖非神俊

稍似瑰奇以臣微誠輒敢陳獻風霜之後儻或得用於三
驅鳥雀之中曾冀成名於一擲干冒宸宸無任戰越

同州進雙鷄等狀

元禎

同州防禦使供進鳥鵲并雙鷄共四聯右臣當州元禎十
五年奉宣令採雙鷄五聯各重四斤頻年採取一聯不獲
自臣到州詢問採捕人等皆云二十年前採得一聯雙鷄
爾後不曾採得昨旬日之內併獲兩聯斤兩輕重稍符詔
旨况浚郊初啓旣已大剪豺狼鷲鳥員來可以助清梟獍
臣所以恨身無羽翼不獲陪奉屬車擒狡兔之根源破狐
狸集作妖狐之群黨臣某無任忘軀思奮覩物感恩之至謹遣
某官某乙隨狀奉進謹進

爲政事進白雀狀

蘇頲

君巢於黃門外雀過官廳事丹眸瑩微微明若流珠嘉毳鮮
華光如蘊玉臣等謹按瑞應圖白雀主鐵券陰之精也不
來則國無俊嗣伏以清宮踐位慶重離於上天黃閣曾巢
屬五瑞於明日固以事優御符聲高作頌臣等叨陪近侍
喜萬恒情無任抃躍之至

文苑英華卷第六百四十二

文苑英華卷第六百四十三

狀十六

雜奏狀

奏度女道士等狀二首

代伊僕射奏請女正度狀一首

奏得嘉禾嘉瓜狀一首

奏行營兵馬狀一首

奏投降回鶻狀一首

奏黃家賊事宜狀一首

奏太原官吏選數狀一首

奏教習長槍弓弩狀一首

奏排比第二般差撥兵馬狀一首

奏教兵馬狀一首

奏差赴許州兵馬狀一首

奏加嶺南州縣官料錢狀一首

奏推管長平義倉狀一首

奏令子弟主辨遷奉狀一首

奏孝子劉敦儒狀一首

奏百姓割股狀二首

奏誅逆人等狀一首

奏黃州錄事參軍張紹棄妻狀一首

奏貶姜鉢狀一首

奏度女道士無名尼等狀

王仲周

右伏以代理弘道三教同歸聖誕佳辰萬靈叶慶上件女道士無名尼或早授畢法已聞具戒願編僧道之錄永遂修持之心今因降誕日伏乞賜其正度

奏姚季立妻克女道士狀

前人

右件驍將自貞元年身亡其妻行服三年情禮畢備去歲秋首已及祥除素習真經志願入道伏以草野之人能修栢舟之誓義足以勸志不可移今因聖誕之辰願崇景福請度克女道士法名真玄仍請就潤州道林觀

代伊僕射奏請女正度狀

呂溫

光祿大夫尚書右僕射南克郡王臣女請度尼某

乙

文苑英華 卷之六

右臣伏以陛下降誕之辰率土蒙幸臣於含氣之內獨受深恩集作受思獨深思所以稱慶南山獻心北極遂割骨肉之愛

俾歸岑寂之門結幽願於金仙奉勝因於寶壽冒昧上請精誠匪他陛下以釐革初行渙汗無反憐臣罄至之分事

與恩違念臣愚魯之忠貸於法外特降中使俯加慰諭臣忝居端右之地首干畫一之科集作文誠雖奉上義乖率下

合當嚴譴忽被殊私震驚失圖慙跼罔擬荷降鑒之明原情斯在蒙曲全之澤為感則深輒集作輕瀆宸嚴伏增殞越

謹奏

奏汴州封丘縣得嘉禾浚儀得嘉瓜狀 韓愈集

右謹按符瑞圖王者德至於地則嘉禾生伏惟皇帝陛下

道合天地恩霑動植邇無不協遠無不賓神人以和風雨

咸若前件嘉禾等或两根並植一穗連房或延蔓敷榮異實共蒂既叶和同之慶又標豐稔之祥感自皇恩微莖何

極於造化親逢嘉瑞小臣喜遇於休明無任云云

奏差赴唐州行營軍馬狀 崔行先

右伏奉今日日墨詔令選擇馬軍三日騎隨中使赴唐州

臣當時已具聞奏訖臣所管士馬常經校試蓄銳斯久惟忠益彰常持報國之心盡秉一作盡懷恩之分忽奉詔命頓

生光輝豈意宸私俯察誠願三軍抃舞闔境歡呼並喻以勲忠形於感激雖慙數寡不愧衆多蔚為天討之師自假

神威之福其器械軍容等並得鮮潔亦稍豐饒以今月十

文苑英華 卷之六

三日從鳳翔府隨中使進發訖臣職當護塞志切除奸不獲齒列諸軍身先士卒助銛鋒於破賊逆節斯摧俾付寸燭以燎原焚枯可待臣無任憤悱踴躍之至

奉投降廻鶻大首領大將軍安達于等狀 于邨

右臣得邠州節度使牒上件人等背逆歸順云被懷恩招來打鳴沙縣便擬將叔長安爲不奉可汗處分遂却廻邠寧投降並到使訖謹遣監軍使徐欽令領赴闕庭者廻鶻遠蕃素効誠節自中原俶擾累建勲庸陛下約爲弟兄式崇惠好我即示以恩信親仁善隣之道彼亦懷於德澤爲不侵叛之臣而逆豎猖狂間行招誘初遭誑惑雖衿甲而即戎遽感恩私竟束身而請命可汗旣不助逆懷恩當即

成擒殘孽永清指期非遠

代裴中丞奏邕管黃家賊事宜狀 柳宗元

右今月四日邕管奏事官嚴訓過稱押衙譚叔向等與黃家賊五千餘人謀爲翻動雖已誅斬猶未清寧臣當時差本道同十將試光祿卿雷遶至邕管界首賓州以來刺集迎探事宜兼爲聲援昨得雷遶十四日狀并嚴訓狀報同

到其黃家賊並已退散各歸洞穴訖伏以鼠竊狗偷非足爲患陛下威靈遠被神化旁行遂使姦狡集之謀先期

而自露回邪之黨不戮而盡滅集伏恐飛章已達吉語

未聞上軫天心猶煩廟筭臣謬居方鎮忝接疆界所得事宜不敢不奏

奏太原府資望及官吏選數狀 令狐楚

右臣得司錄參軍李且等狀稱前件府名三都望同兩府
吏曹近日稍易舊規格限之中增加選數特乞奏聞者謹
檢開元十一年正月二十八日勅置比都府縣資望並準
京北府河南府中間吏曹斲有降下前使王縉薛蕪訓馬
燧李說并有舉奏尋蒙復舊今準三月十五日勅停減諸
州府雙曹司錄判司及甲曹參軍特蒙勅旨京北河南太
原三府不在減限伏以太原府龍興盛業天啓雄藩有義
旗起建一作建起之堂爲仙駕晉遊之地官標留守驛署都亭
典章甚明制度咸在數年來吏部選格不同京北河南兩
府官資稍下選數則深掾吏諸臣懇有披訴儻伺疑作徇從

權之義恐乖仍舊之規伏乞聖慈特勅吏部準元勅與並
北河南一例處分

奏教習長鎗及弓弩狀

前人

右淮泗寇猶或未一作未掃除天下人臣皆思奮擊臣伏以射
渠魁之目勁弩爲先春大憝之心長鎗是切比雖無習多
不專精臣今選定前件官健取八月四日於城東起教不
敢不奏

奏排比第二般差揆兵馬狀 前人

右臣伏以逆賊吳少誠孤負聖明作爲奸亂尚延晷刻之
命未即雷霆之誅天下人臣皆同憤激况臣任當旄鉞誓
掃煙塵割飢肉以資軍亦無所苦執干戈而衛國惟恐不

堪况將士等忠義居心堅剛挺質勇於戰陣樂此征行臣
謹差前件兵馬如前其資裝器械一事已上並無所闕續
具發日聞奏杖其忠順兵氣自雄諭以功名衆心皆勵矧
茲窮寇非足勞師伏望天恩不至憂軫

奏教當道兵馬狀

前人

右臣伏以不教視成爲國之蠹政有備無患前王之格言
今吳少誠叛煥汝南憑陵淮右雖鳥鳶嘯聚見彈已驚而
枳棘萌生涸鋤其本昨臣所陳章奏願往討平及奉詔書
但令排比在軍中之百事誠有舊規以麾下之萬人要知
新令謹取今月二十五日於東城準教教習至二十九日
大設後各勒歸本鎮不敢不奏

奏差兵馬赴許州救援并謝宣慰狀 前人

右中使臣希潛至伏奉詔書兼宣恩旨慰問臣今差前件
兵馬者臣伏以吳少誠內懷奸詐上負聖明因幸隣喪遂
虧臣節提携逆黨逼迫孤城凡在忠良不勝憤切况臣謬
居方鎮便合封平伏蒙陛下委曲照臨丁寧誨諭感槩而
毛髮盡勁憤啓而肺腸皆激諸軍會合計日剪除當道兵
馬差定訖已具列狀奏聞

奏加嶺南州縣官課料錢狀 孔揆

右伏以前件州縣或星布海壖或斗一作雲絕荒外首領強
黠人戶傷殘撫御緝綏尤藉材幹刺史縣令皆非正員使
司相承一例差攝貞庶者懇不願去貪求者苟務徇私臣

自到州深知其弊必若責之以理莫若加給料錢今具分折如前並不破上供錢物輒陳管見務在遠圖伏乞天恩允臣所請

奏桂管常平義倉狀

李渤

臣伏詳勅文本救荒歎忽有危切貴及其時當州去京往來萬里奏廻方給豈及飢人臣請所管忽遇災荒量事賑貸訖續分折聞奏庶使遠人速活聖澤遐流臣之所管僻在嶺外迫以山賊人尤難理若令數改必困蝨食常平義倉本救災害向爲歛診擢臣處之方鎮臣宜竭力上答皇明伏乞聖恩允臣所奏庶使皇靈遠被礦俗知恩

奏準詔令子弟主辨遷奉事狀 裴次元

臣某言伏以幸遇通年奏請遷奉事伏奉月日手詔令子

弟主辨以趨時日者私願上陳天書下降跪承恩一作命

榮感失圖臣實不尺幼丁家禍荐鍾凶釁方在童蒙逮于

成人終鮮兄弟比以時日非便顧室且貧日居月諸未辨

歸祔痛心疾首以候吉辰昨日一作皆陳露下情求替遷奉

赴任之日亦具奏聞今奉詔書令子弟主辨雖懇辭上贖

而天聽未廻荷朝廷之寄深望阡兆而心殞臣即準詔遣

子弟專往揚州舒州主辨便赴上都續具聞奏臣揆以才

劣職任非輕不敢重陳再煩睿覽懷罔極之感章奏冀允

於深誠奉絲綸之書獎任益彰於聖旨顧違恩重哀荷難

任臣不勝荒塞摧逼之至

奏孝子劉敦儒狀

權德輿元和八年時為東都尉守

孝子劉敦儒年四十九曾祖子玄祖祖貺父決住東都從善坊

右件人名儒史官之家積成教義至性誠孝感動人倫母

患風狂心緒乖亂無辜榜箠常至僵仆或凍於積雪之下

或曝於赫日之中腐爛皸瘃一作裂裂畧無完體見其楚毒方

上集作飲食敦儒蘇而復起常懼人知承順恬然不覺疾

痛因心之道貫於神明欲蓋彌彰事久方著蒸乚不匱十

有六年貞元二十集無此字非年留守常夏卿具狀奏聞奉其

年八月二十九日勅宣付史館旌表門閭臣至洛都具詳

事實聞諸族類布在風謐今又十年不改其養飢寒所迫

衣食闕然晷昏所奉朝不繼夕伏以底祿筮仕資蔭多門

至行絕人尤可嘉獎伏望天恩特授一解褐京官使分司

就養則私計集作計食可給寸祿為榮庶厚時風以弘孝理特

乞聖慈允臣所奏集作請謹錄奏聞伏候勅旨

奏百姓王士昊割股狀 令狐楚

右臣得太原府牒前件人為母阿張患病割股奉母其母

所得疾漸損者臣伏以登于大孝在禮為難忍其甚痛於

人不易王士昊長於市井利在錐刀誓以誠明之心療其

羸老之疾割肉於股饋羨于堂信可以感通神明風變人

俗某猥司廉察獲守方隅以此至性恐須旌表

奏榆次縣馮秀誠割股奉母狀 前人

右臣得太原府牒前件人為母父患割股奉母所疾漸損

者臣差當縣主簿劉戡檢驗得狀具如前申者臣伏以縱
螫及膚口猶難忍援刀刺骨心豈易安前件人出於畎畝
之中長在草茅之下天生仁孝日用元和忘甚痛於已軀
期有瘳於親疾人倫共感名教所宗斯實陛下仁菴周王
孝逾虞帝陶蒸動物之性啓迪仁人之心况臣守在方隅
職司廉察擬其至行恐合褒稱

奏誅逆人等狀

于邵

右前件官等或久登清貫或厚受國恩天步艱難不隨清
蹕偽庭頡頑忍飲盜泉或脩撰文書或統制兵馬或動衆
以資敵或作奸以蠹人事跡昭彰實不可掩臣等初命禁
錮伏候聖恩輿議囂然皆將傳刃此輩大逆無道覆奏

容臣參諸禮法按軍令訖匿瑕合垢誠君父之恩私嫉惡
剛腸亦臣下之職分擅此處置伏增戰越

奏黃州錄事參軍張紹棄妻狀

牛僧孺

右臣得張紹妻盧氏狀其張紹寵婢花子每令無禮相陵
臣推問有實者伏以張紹忝跡衣冠幸陶德化不敦二姓
之好敢瀆三綱之經嬖惑女奴蔑侮妻室非特

一作徒

衣服

飲食貴賤渾同兼亦待遇等威衽蓆顛倒款招明白愆尤
至多縱稟性庸愚靡及於教義而歷官州縣合聞於憲章
逞其邪心曾不懼法顧茲醜行恐玷大猷臣職在觀風事
先按俗有關政理敢不申聞伏乞明示罪名流竄遠地使
人知家道以誠士林謹具奏聞伏聽勅旨

奏貶晉陽縣主簿姜鉢狀為人 令狐楚

右臣劉氏堂外生即故碭州刺史伯華嫡孫左補闕某弟
三女是臣亡叔庶子絳州刺史勛外孫父身早亡臣妹多
病遺孤寡婦無所依投及臣總戎來相依止臣見其長成
須有從歸其姜鉢父在大原曾任主簿誠非匹敵誤與婚
姻豈料如獸之心同人面縱橫克悖舉止顛狂旬月之
間豪橫備極惡言醜語所不忍聞有忝祖宗難施面目臣
以為夫婦之道無義則離因遣作書遂令告絕矜其愚下
擬許生全而將校等二十三人播進於庭確論其事具如
前例請以上聞雖忍孤兒可欺其如眾怒難息特希竄謫
以雪冤疑干冒宸宸伏增戰越之至

卷終

文苑英華卷第六百四十四

狀十七

陳請

請亡母邑號狀一首 請公除狀三首

論清舜廟狀一首 處州請隨例行香狀一首

請施行六典開元禮狀一首

奏新羅請廣利方狀一首

請孫守亮代男行營事狀一首

為南承嗣請從軍狀一首

請行軍司馬及少尹狀一首

奏請不叙錄將士狀一首

奏請東都洒掃狀一首

開廩使奏判官改名狀一首

請立前節度使李德裕政碑狀一首

爲長安馬明府亡母請邑號狀 宋之問

臣亡母在於

一作屬在

外戚夙忝末姻不蔭慶雲早先朝露臣

髮膚遺體是亡母所生金紫通班乃聖朝所賜臣每服一輕妙嘗一甘鮮何曾不遠媿劬勞近慚榮寵又見同列有太君拜邑命婦入朝臣早孤偏不勝感羨母因子貴幸者何多祿不及親臣獨含恨明年某月改葬有期私門大事莫踰於此臣內寡材術謬忝朝恩外無愆尤夙承母訓郡縣之號翻及臣妻哀榮之禮不霑臣母臣生不侍養歿未追榮若懼不敢祈恩偷生以安厚祿儻歸泉壤何對慈顏

臣死罪死罪臣準某年月日制令加一階伏乞廻臣此階追贈亡母又臣身死之後合有鼓駕出郊在臣何顏存歿叨僭亦許臣亡母用臣威儀臣身當以遠除存榮死足所祈越禮罪實干誅伏惟陛下孝理寰瀛仁及草木皇室之戚軒冕盛於前朝太后之親恩澤踰於曩日臣幸遇非常之主敢祈不次之恩伏乞陛下少念葭莩垂哀犬馬回臣休寵以慰營魂則今日以前報恩於亡母自茲以後盡命於聖朝無任慙懇悲慕之極謹進狀陳請以聞

爲政事請公除狀三首

蘇頲

臣等聞喪禮俯就所貴從宜古先哲王莫非孝子則知服紀漸變以至於除旣除之後無不從吉祔即吉祭示不可

踰頃者正自山陵奉安宗廟終服變禮今則其時執而不
行將何用禮伏惟皇帝陛下孝思罔極首冠禮經然以神
器至公理循故實今尚未臨正殿猶御慘衣夫以安上理
人莫善於禮今若順情廢禮何以正人群下顛然不知所
措臣等謬陪樞密輒敢陳祈伏乞以禮制情式遵常典無
任悚迫之至

二

臣等伏奉墨制固違群情一作請未許公除臣等茫然罔知
攸措臣聞孝者貴合道禮者貴從宜合道始可行孝從宜
始可達禮况先皇遺旨行孝者共遵國朝舊章達禮者同
守非宜將焉用禮違命豈得稱孝伏以至尊之制與凡庶

不同故易月更除以時漸降山陵既畢謂之反虞宗廟當
祔無不從吉今若除不易月降不以時豈得虞而不祔尚
居喪服所以先儒執禮適變而除王者從權將除必降伏
惟聖懷未慕雖增罔極故事不遠孰可虧違臣等至愚期
於死請

三

臣等愚昧頗觀禮典數百年來漢晉間事主天地者不以
私廢公行喪紀者故以日易月貞觀之後三宗遺訓著在
實錄垂之不朽匪臣等敢率下情屢希上達伏以聖懷罔
極孝思未慕夫人祗之大願持曾閔之小節使祖宗之禮
家國成規陛下因而違之臣等固知其不可皇極神器天

下至公曠時不親衆務皆闕阻群情非順也顛顛億庶仰
望天光徂夏及秋旬有四月陛下何以承顧託何以撫黎
元臣等惶然不知忌諱敢昧死陳請冀垂昭納明日望於
別次視事以寧臣子荒迫之心

論清舜廟狀

右臣謹按地圖舜陵在九嶷之山舜廟在太陽之溪舜陵
古老已失太陽溪今不知處秦漢以來置廟山下年代寢
遠祠宇不存每有詔書令州縣致祭奠酌荒野恭命而已
豈有盛德大業百王師表沒投集作於荒裔陵廟皆無臣謹
遵舊制於州西山上已立廟訖特望集作乞天恩許蠲免近
廟三五集作一兩家令歲時掃集作拂灑以集作示爲恒式豈獨表

聖人至德及於萬代實欲彰陛下玄澤被於無窮謹錄奏
聞初依

處州請隨例行香狀

齊映

右準式文臣當州不在行香之數伏以聖朝弘孝御下崇
德追先憑法力於傳香表未懷於率土下垂甲令旁感物
情臣州稍以遐遠比於列郡遂漏恩私俱成亭育之中獨
隔情禮之外况語桂廣則道里猶近並接衢婺則州望悉
同推於等夷倍切誠懇又垂白之老一命之士或生於開
元天寶或逮事肅宗代宗從頂至足生成是賴五月六月
思慕彌深方當感切之辰難抑衆庶之意臣又以國家榮
建寺觀繼度緇黃所種田疇已爲優厚食時受供皆荷殊

恩已辰脩齋當茲別給如蒙聖澤許同隣州應緣香燈所
需皆率官吏取足於刺史以至末班輕減俸錢敬修法事
庶使山越遺老咸覩漢儀海郡具僚率由唐典無任至誠
至懇之至

代鄭相公請刪定施行六典開元禮狀 呂溫

右臣聞化人成俗莫大於禮樂垂統建中必資於制度然
而忠敬有弊質文異數群儒之得失鋒起歷代之沿革絲
棼或榮古而漏今名實交喪或違經而便事本末相忘或
煩雜集作以為詳或闊略而集作為要未聞折衷以叶通
方國家與天惟新改物視聽太宗拯焚溺之餘輶立統紀
玄宗承富庶之後方暇論思爰勅宰臣將明睿旨集儒賢

於別殿考古訓於秘文以論材審官之法作大唐六典三

十卷以導集作德齊禮之力作開元新禮一百五十卷網

羅遺逸芟翦竒邪亘百代以旁通立一王之定制草奏三

復祇令宣示中外星周六紀未有明詔施行遂使祭喪冠

婚家猶異禮等威名分官靡成規不時裁正貽弊方遠伏

惟睿聖文武皇帝陛下恢纂鴻業升于大猷雷霆奮有截

之威日月廓無私之照三叛就戮四夷來賓牛馬放集作

於農郊兵革藏於武庫嚴禋上帝祇受鴻名惟懷永圖不

自滿假昧爽聽政子夜觀書處成功而弗休率集作至理

若不及每懷經始則知貞觀之難言念持盈思復開元之

盛臣諤忝密集作務兼掌圖籍無能輔弼集作已負於恩

私有所建集作發明豈先於典禮伏見前件開元禮六典等

聖集作先朝所制鬱而未用奉揚遺美允屬欽明然或損益

之間討論未盡或弛張之間宜稱不同將貽末代之規必

俟集作候不刊之妙臣請於常參官內選學藝優深理識通

遠集作敏者三五人就集賢院各盡異同量加刪定然後敢

塵集作冀紆睿覽特降德音明下有司著為恒式使公私共守

貴賤遵行苟有愆違必正刑憲如此則職官有制將興濟

濟之詩風俗大同坐致熙熙之詠見可而獻知無不為輒

瀆宸嚴伏增殞越謹狀

代淮南杜司徒奏集作論新羅請廣利方狀

劉禹錫

淮南節度觀察處置等使勅賜貞元廣利方五卷右臣得

新羅賀正使牒集作牒如言狀稱請前件方狀一部將歸本

國者伏以纂集神効出自聖衷藥必易求疾無隱狀搜方

脉之秘要拯生靈之天瘥坐此華胥咸躋仁壽遂令絕域

逖聽風聲美茲豐功爰有誠請以其久稱藩附素混車書

航海獻琛既以通於華禮釋疴蠲疾集作癘豈獨隔於內集作

外區正當四海為家冀覩十全之効臣即欲寫付未敢自

專謹錄奏聞

請孫守亮代男行營事狀代郭子儀于邵

右臣前日而奉進旨前件男領兵馬赴靈州伏以朔方軍

幕宿將頗多任以兵權合先勲舊非獨藉其時望亦以厭

伏衆心男晞年纔成立素不更事雖薄閑騎射而未有智
謀軍政弛張或非詳練昨緣逆徒在近畿旬多震令統先
軍以當大敵倉皇之際不可固避畢力捐軀幸摧堅陣此
天威所及非童子有成欲速赴邊陲實恐未堪專任右廂
兵馬使開府孫守亮出身入仕皆在軍行將校畏威士卒
懷惠智能料敵勇可摧兇使與渾日進同行必冀免貽聖
慮又男悌自幼及長首末隨臣常在私庭未嘗遠行深願
容其澣濯許以旬月休閑他日更有任使敢不奔波道路
臣位崇寄重効淺恩深常恐委任失人以速官謗知子者
父敢不上陳伏乞天慈俯哀誠請

爲南承嗣請從軍狀

柳宗元

故其官贈某官某乙男某官某乙右臣亡父至德之歲死
節雖陽陛下每降鴻恩必加褒寵臣自七歲即忝班榮垂
五十年常居祿秩再守遐郡績用無成終貽官謗其就嚴
譴無以負荷先志報効殊私以慚以懼殞越無地伏見某
月日勅以王承宗負恩干紀命將徂征雷霆所加殘集作珍
滅在近臣竊不自揆思竭忠誠願以集作預一卒之任以答
百生之幸庶得摧集作推鋒觸刃摩壘舉旗冀獲盡於微誠
儻不墜於遺烈踴躍之至夙夜靡集作不寧敢希皇明俯鑒
冊懇臣聞周官考藝國子置車甲之司漢道推恩孤兒備
羽林之用千秋思奮於事越仲孺期死於奔吳義激君親
名高竹帛臣雖無似有慕昔人雖身塗草野死而不朽披

肝瀝血昧死上陳無任懇迫憤激集作忠憤之至謹錄奏聞伏候勅旨

請行軍司馬及少尹狀為人作 令狐楚

右臣適蒙恩獎獲守方隅力小任大常憂敗累伏以行軍司馬相副之職知府少尹共理之官未得其人久空此位每平均征賦繕理邊陲實藉通材以分重寄伏惟陛下察臣心之懇款知軍務之殷繁選於中外為此別貳陛下所用即臣所知苟獲同心庶無闕事謹遣某官奉狀奏請

為滎陽公奏請不叙錄將士狀 李商隱

使當道將士及管内昭賀等州軍士共二千一百二十六人準去年五月五日制叙勲階使司去今年四月二十五

日具將士姓名及甲授年月日申省訖右臣當道將士等遠當戎寄式控遐陬乘解愠之和寧親矢石望拱辰之列實隔煙波近者朝廷菴靖北方惟荒東道當陰山之哭虜靡効織埃及天井之摧鹵不橫寸草徒以皇帝陛下非煙結彩集作蔭滾露流光向明綽及於鳳樓布澤遠霑於蠻徼

固合同承國慶共稟朝榮伏以當管近無豐年亦經小水海上有分屯之卒邕南有未返之師歎冗食於居人困裹糧於戎士臣初叨庶問方切拊循雖拾給升階各思受寵而濡毫執簡無以為資仰慮後期敢忘積懼伏見比者諸道有物力未足者聖恩洪貸許且權未叙錄竊緣往例冒此上陳伏冀天慈曲垂矜許臣與將士等無任感激冒昧

戰越之至

為楊贊善奏請東都酒掃狀

前人

右臣先臣贈太保其塋在河南縣界臣自終喪紀便參朝
倫三年贊道於宮庭千里違離於墳墓竊惟令式合許
除追遠興情收希塋於陸曄報恩未死寧自誓於義之伏
乞聖慈特從

一作鑒
集作九 丹懇

為閑廡使奏判官韓勵改名狀 前人

右前件官名與再從叔故媯州叅軍自勵向下一字同伏
以韓自勵頃因官遊歿於幽朔羈孤未返親黨莫知近始
言歸因之合族雖為子之道則慎更明於已孤而諸父之
集作
來固難舉諱於其側伏請改名融謹錄奏聞伏聽勅

音

請立前節度使李德裕德政碑文狀 張次宗

右伏以勲著王室者則銘於景鍾功及生人者則刊於樂
石故扶風存必拜之地岷山有墮一作墜 涑之思固有舊章

蓋無虛羨竊以李某纘慶相門伏膺儒業得卻穀詩書之
學兼祭遵儒雅之風自授任坤方鎮安全蜀亭戍多警災
早相仍外有定戎一作鎮定之功則城柵相望內有繕完之備

則器甲惟新強寇將罷其東漁隣敵自止其南牧况今令
政一作行屬郡威肅運營來暮之謠已彰於昔歲去思之美

無謝於古人今合境同詞諸郡獻狀雖黃霸入用寵方盛
於登賢而鄧侯不畱情猶深於愛樹臣謬當交代備聞政

能願嗟卧輒之情特允紀功之請無任云云

文苑英華卷第六百四十四

文苑英華卷第六百四十五

檄

一此卷英華所編失年代先後今正之

為彭城王檄征鎮文

為太祖檄齊神武高歡文

為東魏檄梁文

為行軍元帥鄭國公檄陳文

為北齊檄陳文

為侯莫陳悅檄陳蕭摩訶文

隨檄陳尚書江惓文

為彭城王檄征鎮文

孔熙元今弟休先作

揚州刺史徐湛之告四方王公守宰夫休否相乘天道無



常一作道无恒泰 任狡肆逆明哲是殛故小白有一匡之勲重耳

有翼戴之德自景平肇始皇室多故大行皇帝天誕英姿

聰明睿武一作哲 拔自藩國嗣位統天憂勞萬機秉一作垂心

庶務是以邦内安逸英華作邦家 安危恐非 四海同風而頃一作比年

已來姦豎亂政刑法違棄一作刑 罰乖滯 陰陽一作 舛致使釁

起蕭牆飛禍卒集一作危 禍萃集 賊臣趙伯符積怨含毒遂縱兇

醜一作姦 兇 肆兵犯蹕禍流儲貳一作宰 崇樹非所一作類 傾墜皇

基罪百浞徿過千玄莽開闢以來未聞斯比率土叩心華

夷泣血咸懷亡身之誠同思糜軀之報蒞之畢與行中領

軍蕭思話行護軍將軍臧質行左衛將軍孔熙先建威將

軍孔休先忠貫白日誠期一作著 幽顯義痛其心事傷其目

投命奮戈萬殞莫顧即日斬伯符首及其黨與雖豺狼即

戮惟新告始一作道 惟新 而普天無統一作主 羣蒙靡係一作莫 繼 彭

城王體自高祖明明一作聖明 在躬德格天地勲溢區宇世路

威夷勿用南服龍潛鳳棲于茲六稔蒼生饑德億兆渴化

豈惟東征有鷓鴣之歌陝西有勿剪之歎一作思 而已哉靈

祗告徵祥之應識記表帝王一作者 之符上愜一作谷 天心下

令人望一作下 愜民望 正位辰極非王而誰今遣行護軍將軍臧

質等齋皇帝璽綬星馳奉迎百官備禮駱驛繼進並命羣

師鎮戍常若干撓義徒有犯無貸昔年使反湛之奉賜手

勅逆誠禍亂預覩期萌令宣示朝賢共拯危溺若無斷謀

事失於後機遂使聖躬濫酷大變奄集哀恨崩裂撫心摧

梗不知何地可以厝身輒督勵阨頓死而後已一作皆宋書苑畢傳

英華錄謀逆之檄未詳

為周太祖檄齊神武高歡文西魏末熙三年

蓋聞陰陽通用盛衰相襲苟當百六無聞周書作三五皇無間

家創歷陶鑄蒼生保安四海仁育萬物運距孝昌屯沴屢

起隴冀搔北史作騷動燕河狼顧雖靈命重啓蕩定有期而乘

釁之徒因生羽翼賊臣高歡器識庸下出自輿阜罕聞禮

義直以一介鷹犬効力戎行覲冒恩私遂竊北史作皆榮寵不

能竭誠盡節專挾姦回乃勸爾朱榮行茲篡逆及榮以專

政伏誅世隆以兇黨外叛英華作世濟凶黨非歡苦相敦勉令取京

師又歡吐萬兒復為弑虐英華作傷殺暴虐暨立建明以令天下

假推普泰欲竊威權並歸廢斥俱見酷害於是彌兵河北

假討爾朱亟通表奏云取讒賊周書作敗既行廢黜遂將篡弑

以人望未改恐鼎鑊交及乃求宗室權允人心天方與魏

必將有主翊戴聖明誠非歡力而歡阻兵安忍自以為功

廣布腹心跨州連郡端揆禁闈莫非親黨皆行貪虐竅竅

生靈而舊將名臣正人直士橫生瘡痍動挂網羅故武衛

將軍伊琳清貞剛毅北史作貞直武毅禁旅攸屬直閣將軍鮮于

康仁忠亮驍傑爪牙斯在歡收而戮之曾無聞奏司空高

乾是其黨與每相影響謀危社稷但以姦志未從恐先泄

漏乃密白朝廷使殺高乾方哭對其弟彌天子橫戮孫騰

任祥歡之心膺並使入居樞近伺國間隙知歡逆謀將發

相繼歸逃歡益加撫待亦無陳白然歡入洛之始本有姦
謀令親人蔡雋作牧河濟厚相恩贍以爲東道主人故關
西大都督清水公賀拔岳勲德隆重興亡攸寄歡好亂樂
禍深相忌毒乃與侯莫陳悅陰圖陷害幕府以受律專征
便即討戮歡知逆狀已露稍懷旅拒遂遣蔡雋拒代令竇
泰佐之又遣侯景等云向白馬輔世珍等徑取石濟高隆
之及婁招等屯據壺關韓軌之徒擁衆蒲坂於是上書天
子數論得失訾毀乘輿威武疑作悔朝廷藉此微庸冀茲大
寶溪壑可盈禍心不測或言徑赴荆楚開疆於外或言分
詣伊洛取彼讒人或言欲來入關與幕府決戰今聖明御
運天下清爽百僚師師四隩來暨人盡忠良誰爲君側而

歡威福自己生是亂階緝構南箕指鹿爲馬苞藏兇逆伺
我神器是而可忍孰不可容幕府折衝宇宙親當受朕銳
師百萬穀騎千羣裹糧坐甲唯敵是俟義之所在糜軀匪
恡類有詔書頒告天下稱歡逆亂徵兵致伐今便分命將
帥應機進討或趣其要害或襲其窟穴周書作宅電繞地擊務
合星羅而歡違負天地毒被人鬼乘此掃蕩易同俯拾歡
若渡河稍逼宗北史作宮廟則分命諸將直取并州幕府躬自
東轅電赴伊洛若固其巢穴未敢發動亦命羣帥百道俱
前轅裂賊臣以謝天下其州鎮郡縣率土人黎或州鄉冠
冕或功勲北史作勲庸世濟並宜捨逆歸順立効軍門封賞之
科已別有格凡百君子可不勉旃周書作敷北史作哉

時濟神武稍逼京師魏帝遂入關周太祖乃奉魏帝都
長安披草來立朝廷軍國之政或取決於太祖

此篇英華所載甚略今以周書北史增入

爲東魏檄梁文

杜弼藝文類聚
作魏收

觀夫辰象麗天山岳鎮地方以類聚物以羣分建之以邦

國樹之以君長日月於是莫二一作宇宙一作所以摠一

雖五運相推百王革命此道之一作行孰之能改一作孰

而皇家承統光配彼天義洽幽明化周動植崇文德以來

遠脩禮讓以止訟舞干戚於兩階執玉帛於萬國玄功潛

運至德旁通百姓日用而不知兆民受賜而無迹唯彼吳

越獨阻聲教匪民之咎責有由焉而元首懷止戈之心上

宰薄兵車之會遂解繫南冠喻以好睦舟車遵沂州陸同

光事一作息奔走之勞屯戍無逼卒之變雖嘉謨長筭爰自

我始而罷兵息民彼獲其利侯景豎子本無事一作業乃

枉道於人間遂乾沒於世上鳴伏於爾朱之門鎮守於普

泰之日曾無爲主之識詎有挈瓶之智既而投命義旗歸

身幕府殊異雍齒有類丁公時逢寬政得免大戮棄其瑕

滓收其力用預在行伍叅跡驅馳及秦隴逋誅每事經略

以河南是空虛之地漢陽非兵戰之衝薄存犄角聊示旗

鼓豈資實効寄以遊聲軍機催勒蓋維景任揔兵統旅則

有司存而愚褊有積驕憤遂甚屢犯軍紀自生疑貳禍心

潛構翻成亂階負恩棄德罔恤天討不義不昵厚而必顛

委慈母似脫屣棄寵弟如遺芥龍鍾稚子痛苦成行變彼

諸姬破亡爲伍滅伯春之婉轉慕姜兒之爽言不與狼虎
同仁而共豺狸等惡及遠託關隴依憑姦異逆主定君臣
之分賊臣結兄弟之親解其倒懸仰人鼻息一日無恩終
成難養俄而易慮躬擐干戈釁暴惡盈側首無託以金陵
逋逃之藪江南統御一作流離之地甘辭卑體進熟圖身讒言
浮說抑可知矣叛豎投命豈將擇音而僞朝大小幸災志
義主荒於上臣蔽於下逐雀去草曾不是圖竊寶叛邑椒
蘭比好人而無禮其能國乎亦旣失信不亡何待今帝道
休明皇猷允塞四民樂業百靈効祉故丞相材標國貞道
潤時雨義冠伊霍勲蓋桓文大君立德世功世祿作民舟
楫爲國棟梁內外齊心上下同德蛟騰虎嘯風生雲起

日則車懸轉舍排山則龍門洞開吞雲夢於胸中運天下

於掌內雖有賊臣去國亡卒出境何異一毛之落牛體雙

鳧之飛海曲

一作濱

彼旣連結姦惡斷絕隣好追兵保境縱

盜侵國蓋物無定方事無常勢或乘利而受害或因得而
更失是以吳侵齊境遂致勾踐之師趙納韓地終有長平
之役矧乃鞭撻疲民侵軼徐部築壘擁川捨信邀利此而
可忍孰不可懷是以援乘麾殞之將投石拔距之士深衛
僞主信納亡叛含怒作色如赴私讐意存涉血義不旋踵
攻戰之利實若有神徵兵聚衆依山傍水舉螳螂之斧被
結蟻之甲當窮轍以待輪坐積薪而候燎及其鋒刃斃援
埃塵旦接便已亡戟棄戈土崩瓦解貞陽以從一作子之

親為戎首之任非獨

一作但

力屈道窮亦將無路還蜀蕪亦

復一作

挾子垂翅俱在籠樊將士以昧禍之心為助亂之事

皆掬指舟中披甲鼓下同宗異姓纍纍相望曲直既殊強弱不等父出子孤自取其敗違卜復諫何以辭責雖復貪利苟得背同即異獲一人而失一國見黃雀而忘深井食鈎吻以療饑飲鳩毒以救渴智者所不為仁者所不向誠既往之難迹猶將來之可追景以鄙俚之夫遭風雲之會位登三事邑啓萬家揣身量分久當止足而周章向背離披不已夫豈徒然意亦可見彼乃示之以利器誨之以慢藏使其勢得容姦令其時堪乘便既南風不競天亡老賊奸謀將復作矣然則摧堅強者難為功拉枯朽者易為力

言其雖非孫吳猛將燕趙精兵猶是久涉行陣曾習軍旅

豈同輕剽之師不比扼腕之衆距

一作拒

此則作氣不足攻

彼則為勢有餘恐尾大於身踵麤於股倔强不掉狼戾難

馴呼之則反速而釁小不徵

一作懲

則叛遲而禍大會應遙

望廷尉不肯為臣自據淮南亦欲稱帝但恐楚國亡援禍

延林木城門失火殃及池魚橫使漢江

一作江黃

士子荆揚人

物死亡矢石之下支

一作天

折露霧之中彼梁王操行無聞

輕險有素工用其短以少為多反覆山淵顛倒冠履射爵論功盪舟稱力年既老矣耄又及之政荒民流禮崩樂壞改換朝章變易官品雖世異漢朝而事同新室加以用捨乖方立廢失所矯情動衆飾智驚愚毒蟲滿懷安敢試業

躁競盈貫茸謬治情內恣鳴靡外逞殘賊人人厭苦家家

思亂災異降於上怨讟興於下履霜有漸堅冰且至恃浮

一作陰將躁之風俗任輕薄之子孫朋黨路開兵權在外必將

禍生骨肉難起腹心強弩衝城長戟指闕徒探雀鷺無救

府藏之虛空伺一作請熊蹯詎延晷刻之命外崩中潰今實

其時鷓蚌相危一作扼我乘其弊方使高旗舒旆長轂啓行

迅騎追風精甲耀日四七並列百萬為羣風飄雲動星羅

海運以此赴敵何敵不摧以此攻城何城不陷猶為岸上

之虎當作水中之龍以轉石之形為破竹之勢將使鍾山

渡江青蓋入洛荆棘生建業之宮麋鹿遊姑蘇之館但恐

兵一作革車之所轡轢劍騎之所蹈踐杞一作檣梓於焉傾折

竹箭以此摧殘若吳之王孫蜀之公子順時以動見機而

作面縛銜壁肉袒牽羊歸款軍門委命下吏當使焚視而

出拂席相待必以楚材將為晉用固乃喜得異度實自利

獲士衛士龍即援客卿之族將加驃騎之號斯蓋壯士封

侯之日丈夫立節之秋冬冰可折時不再來先事預懷有

如皎日王侯無種工拙在人凡百君子勉求多福若不改

迷坐待淪沒一旦暴骨草莽流血成川猶且不悟噬臍何

及故宣往意馳此簡書檄之到彼咸共申省一作藝文類聚

此檄與藝文類聚資治通鑑所載並同惟魏書島夷

蕭竹傳文既諄復先後亦異今併錄之其僅同者白

字是也

夫乾坤交泰明聖興作有其運行之力俱盡變化之途抱
識含靈融然並至呈形賦命混而同往所以玄功潛運至
德旁通百姓日用而不知萬國受賜而無迹豈徒鑿其耳
目易其心慮悟以風雲一其文軌使夫日月之照不私兩
露之施均洽運諸仁壽之域納於福祿之林自晉政多僻
金行淪蕩中原作戰鬪之場生民爲鳥獸之餌則我皇魏
握玄帝之圖納水靈之祉駕雲車而自北策龍御以圖南
政符上帝援溺下土恠物殛死淫水不作運神器於顧盼
定寶命於踟躕恢之以武功振之以文德宇內反可封之
俗圓首識堯舜之心沙海荒忽之外瀚漠羈縻之表方志
所不傳荒經所不綴莫不繩谷鈞山依風託水共仰中國

之聖同欣大道之行唯夫三吳百越獨阻聲教匪民之咎
責有由焉自僞晉之後劉蕭作慝僭擅一隅號令自己惟
我祖宗馭宇愛民重戰未極謀臣之畫不窮節將之兵聊
遣行人降以尺一圓臺已築黃屋輒去賜其几杖置之度
外蕭衍輕險有素士操箴聞睥睨君親自少而長好亂樂
禍惡直醜正巧用其短以少爲多該惑愚淺大言以驚俗
驅扇邪僻口兵以作威曲體脅肩搔唇鼓舌候當朝之顧
指邀在位之餘論遂汗辱冠帶偷竊藩維及寶卷昏狂下
不堪命曾無北面有犯之節遽滅人倫在三之禮憑妖假
恠鬼語神言稱兵指闕傾朝鳩主陵虐孤寡聾愚士民天
不悔禍姦醜得志內恣雕靡外逞殘賊驅羸國之兵逼糊

口之衆南出五嶺北防九江屯戍不解後無寧歲死亡矢
刃之下夭折露霧之中哭泣者無已傷痍者不絕託身人
上忽下如草遂使頑嚚子弟肆行姪虐狡猾羣小縱極貪
恠剝割蒼生肌肉略盡剝剔黔首骨髓俱罄猛虎未方其
害餓狼詎侔其禍慄慄周餘救死無地至於矯情飾詐事
非一緒毒螫滿懷妄敦戒業噪競盈膏謬治清靜至乃大
興寺塔廣繕臺堂昭陽倒景垂珠銜璧崢嶸刻削千門萬
戶鞭撻疲民盡其筋骨延壤運石悲歌掩途死而可祈其
同仙化智淺謀疎曾不自揆過桐栢之流翻爲已害子亡
齊之胤忽爲戎首書契迄茲罕聞其事至於廢捐冢嫡崇
黜愚子朋黨路開彼我側目疾視扼腕十室而九翹是有

神良亦多人二紀於茲王家多故始則車馳之警終有驚
墜之哀神祇痛憤寓縣崩震於是故相國齊獻武高王感
天壤之慘黷激雲雷以慨然伏高義而率民奮大節以成
務爰有匡國定霸之圖非直討賊雪耻之舉於是睿畧紛
紜靈武冠世盪滌通孽尊主康邦皇上秉歷受圖天臨日
鏡道隨玄運德與神行旣而元首懷舞戚之風上宰薄兵
車之會遂解繫南冠喻以好睦舟車遵遡川陸光華亭微
相望欣然自泰反肉還童不待羊陸雖嘉謀長筭爰自我
始罷戰息民兩獲其泰王者之信明如四時豈或爲人君
父二三其德書而不法可不惜哉侯景一介役夫出自凡
賤身名淪蔽無或可紀直以趨馳便習見愛爾朱小人叨

竊遂忝名位及中興之際義旗四指元惡不赦實在羣胡
景荷人成拔藉其股肱主人有丹頸之期所天臨族滅之
釁雖不能蔽捍左右以命酬恩猶當慘顏後至義形於色
而趣利改圖速如覆手投身麾下甘爲僕隸獻武至側棄
其瑕穢錄其小誠得廁五命之末預在一墜之後參跡驅
馳庶其來効長鞭利鍛術以制之旣關隴逋誅每事經略
以河南虛空之地非兵戰之衝薄存犄角聊示旗鼓豈資
實効寄以遊聲軍機催勒蓋惟景任摠兵統旅別有司存
而愚福有積僥倖遂甚犯違軍紀仍自徭貳禍心潛構翻
爲亂階負恩棄德罔恤天討不義不昵厚而必顛委慈母
如脫徒棄少弟如遺土羣子陸陸妻姪成行慕姜兒之糞

言符伯春之宛轉跳梁猖獗夫欲誰欺比之梟獍異類同
醜欲擬蛇鼠顧非其倫及遠託關右委命寇逆寶炬定君
臣之分黑獺結兄弟之親授以名器之尊救其重圍之死
憑人擊援假人鼻息我而忘恩背惠親尋干戈釁暴惡盈
側首無託以金陵逋逃之藪江南流禦之地甘辭卑體進
熟圖身詭言浮說抑可知矣叛豎救命豈將擇音僞朝大
夫幸災忘義主耄於上臣蔽於下遂雀去草曾不是圖竊
寶叛邑椒蘭比好人而無禮其能國乎夫安危有大勢成
敗有恒兆不假離宋之目不藉子野之聽聊陳刺心之說
且吐代謀之言今帝道休明皇猷允塞四民樂業百靈効
祉雖上相云亡而伊陟繼事秉文經武虎視龍驤驅日下

之俊雄收一世之英銳擊刺猶雷電合戰如風雨控弦躍
馬固敵是求蠕蠕昔遭離亂輻分瓦裂匹馬孤征告困於
我國家深敦隣附愍其入懷盡憂人之禮極繼絕之義保
衛出於故地資給唯其多少存其已亡之業成其莫大之
基深仁厚德鏤其骨髓引領思報義如手足吐谷渾深執
忠孝膠漆不渝萬里仰德奏款屬路並申以婚好行禮如
歸蠕蠕境斜界黃河望通幽夏飛雪千里魯冰洞積北風
轉勁實筋骨之時沍寒方猛正纜裘之利吐谷渾疾彼凶
逆疆兵歲舉傾河及鄯塵通隴峽驅龍池之種藉常勝之
氣二方候隙企其移種加以獨孤如願擁衆秦中治兵劫
惰黑獺北備西擬內營腹心救首救尾疲於奔命豈暇

兵東指出師函谷且秋風揚塵國有恒防關河形勝之際

山川襟帶之所猛將精兵基峙岳立又寶炬河音之北黑

獺北史作莽山之走衆無一旅僅以身歸就其不顧根

本輕懷進趣斯則一勞未逸天贊我也言之旦旦日月經

天舉世所知義非徒語持此量之理有可見則侯景遊辭

莫非虛誕夫景繩樞席牖之子阡陌鄙俚之夫遭風塵之

會逢馳騫之日遂位在三吏邑啓千社揣身量分久當止

足而乃周章去就離跂不已夫豈徒爾事可摧揚度其衆

叛親離守死不暇乃聞將棄懸瓠遠赴彭城老賊姦謀復

將作矣固揚聲赴助計在圖襲吞淵明之衆招厭虐之民

舉長淮以爲斷仍鴟張歲月南面假名死而有已此蓋蜂

鷓鴣之禍我承其弊且僞主昏悖不惟善隣賊忍之心老而
彌篤納逋叛之詭譎蔑信義以倡狂天喪其神人重其怨
將踐瓜圃之蹤且追兇侯之轍今徵發犬羊侵軼徐部築
壘擁川覬覦小利此而可忍孰不可懷兵凶戰危出不得
已謬奉朝規肅茲九伐扛鼎拔樹之衆超乘投石之旅練
甲爭途波聚霧合虎班龍文之逸蘭池蒲梢之駟噓天陸
野躡影追風振旅南轅長驅討賊非直三吳鼠面一麾魚
駭乘此而往青蓋將歸且衍虐網蚩兵權在外持險躁之
風俗蕪輕薄之子孫蕭綸兇狡之魁豈無商臣之恨蕭譽
失志之憤當召專諸之客外崩中潰今也其時幕府師行
以禮兵動以義弔民代罪理有存焉其有知機審變翻然
奮起立功立事去危就安賞典未忘事必加等若軍威所
至敢有拒違尺兇已上咸從梟戮今三禮四義之將豹虎
熊羆之士深禦逋僞信納叛亡違卜悞諫實與代役莫不
含怒作色如赴私讐茹肝涉血義不旋踵攻戰之日事若
有神莽積麻亂匪旦伊夕以彼曲師危卒望我軍鋒何異
蝓蛄披甲蚍蜉舉尾正恐旗鼓一接芝藿俱摧先事喻懷
備知翰墨王侯無種禍福由人斯蓋丈夫肉食之秋壯士
封侯之會冬冰可折時不再來凡百君子勉求多福檄之
所到咸共申省知我國行師之意

爲行軍元帥鄖國公韋孝寬檄陳文

周宣帝大
象元年

僞陳私署公卿將校州鎮郡縣村屯邑落蓋聞五精上列

耀魄惣其威靈萬國下分皇王攝其區域至其創業垂統
革命受終奄有神州光宅函夏莫不垂極襲聖積德累仁
播厚利於人民建大功於天地然後幽明贊叶兆庶歸往
瑞之以龍圖鳳紀崇之以玉璽黃屋故能照臨九縣對越
兩儀永保鴻名長爲稱首未有蠻陬夷落裔土荒隅崛起
阡陌之中妄竊帝王之號斯則僭越之首縣一作懸同於漢闕
亡吳之主會於晉臣布在方冊可以龜鏡者也我太祖文
武皇帝自天攸縱膺運挺生屈道藩條或躍伊始屬玄運
將改祿去王室三川已震九鼎將飛事功在泥祿疑作深
流莩乃推誠伏羲援手濡足迎衛乘輿崇建旒社舉天維
於將墜振一作正地軸於已傾血氣食毛咸受其賜是則我

大造於區夏也重以關土服遠包荆卷蜀功高於九合
業重於三分愈執忠貞之操終以人臣之禮至哉大矣無
得稱焉旣而謳歌允屬金石變響神器大寶用集我有周
我閔皇帝乃上膺靈命俯順樂推揖讓而登皇極垂衣而
歸撫運世宗續統克隆洪緒武功文德騰茂飛英我高祖
武皇帝以上聖降下武以至道弘丕業其寂也象繫不能
究其微其動也雷霆不能比其變僞齊竊據中原綿歷世
祀一作紀帶之以巨海長淮鎮之以峻岱崇岳其地廣其民
衆其俗富其兵強而帝遷明德人思睿后金鉞一麾廓然
大定申弔伐之義答億兆之心陟方之駕雖遠鼎湖之神
未絕天元皇帝負四聖之休烈協千載之昌期懸金鏡振

玉鼓宏天網廣地絡東窮海外西極河源叩管夜郎之所
冒頓呼韓之類莫不屈膝稽顙泛水梯山被華夏之仁風
仰中國之聖道唯彼揚越獨爲匪民敢芻魚鳥之郡晏安
龜蛇之冗故僞魁陳霸先火耕水耨之夫華門圭竇之子
無行檢於鄉曲充部隸於藩侯施彼呼船之伎展其盜裘
之用值蕭氏喪亂金陵擾攘爛羊啓邑拔卒爲將遂得洗
濯江漢奮迅泥滓王僧辯秉文經武挹義懷仁志在鷹揚
誠深鶴立掃江表之巨寇復梁室之宗社提挈霸先成其
羽翼而背恩忘德毀器折枝密相奄襲忍加屠害節士爲
之扼腕名臣所以流涕蕭方智世有江外實主梁祀霸先
義則臣民任惟輔佐御下暴於戾虎輕上踰於老年疑作
生

傳包此禍心遽行篡弒遂令羣盜歛起宮闈窘逼梁棟之

間顛死一作斃鋒鏑之下旣甚南宮絕宋公之脰又過淳齒

縮齊閔之筋自古逆子亂臣窮兇極悖未有如斯者昌實

霸嗣舊加篡戮殘虐相襲報復循環陳頊獲自儲宮我之

俘隸先朝深弘寬宥免其釁鼓置之夷卹淹歷歲時芻豢

費上林之牧廩卹索長安之米其兄椿發常山之念屢致

誠請國務孤首之感以禮遣送項稟性亮器不義不昵害

厥猶子僭其僞位朝廷遠撫長駕含垢匿瑕遍省不虧韜

軒繼路東夏克平威震淮海乘勝席卷咸請南轅高祖以

得原失信義有不取一作敢懷遠字小理存久大而違盟背

惠忽從茲始搖蕩我邊陲侵軼我彭泗我是以有呂梁之

大宛列傳 卷一百一十五
一
役麾下裴忌程文秀之輩李緒蔣元舉之徒束手軍前不可勝計積甲等孤桐之岫溺卒斷浮聲之流項長惡愈甚守迷不變據如掌之地延翹足之項猶恐臂當轍舉尾支山習黃旗之謬談志青蓋之妖說貫盈數盡今實其時加庚子應年金火入斗天道人事宛若合符混一之期昭然可見寡人不武董茲戎律內稟惟幄出制天淵部勒諸將雷奔電擊大將軍龍門公拓拔王述領巴蜀之兵壹拾貳萬出於白帝水陸俱下大將軍安昌公拓拔則領驍騎五萬濟於南岸循江東轉梁王舉一國之師盡舳艫之盛發自江陵首尾不絕行軍摠管上柱國杞國公亮率步騎一十五萬掃蕩山林自東闕行軍摠管上柱國郟國公士彦

領人馬一十萬濟自泗口徑取廣陵幕府精銳二十萬餘長驅淮水直指江左並同集石首大會金陵凡此諸軍皆從汧隴驍雄幽并勇俠揆犀拔象之夫斬蛟挈兕之士上谷漁陽之騎追風嘯雲荆門鄧塞之舟浮江沿漢象弭飾堂谿之材鷲羽加淇園之竹旌旗麾電戈劔竟野鼓怒則江湖盪沸叱咤則山嶽簸跳以此攻城何城不陷以此衆戰誰能抗禦將恐程門賈霜梧與樗櫟同凋崑山火燎天球共瓊球俱盡故示以禍福冀相全濟陳項若識機知變輿輓轅門當增安樂之封有加歸命之禮僞公卿以下或中華之冠帶流寓江淮或東南之雋楚世載名位豈安危亂之邦事夷裔之主良由身居僞網迹淪寇地雖心存

魏闕無由自拔故耳今正丈夫轉禍一作福之秋君子見機之日若能投誠進款展効立功富貴榮華義同俯拾如有不達機運敢拒王師軍有嚴科刑茲罔赦檄之所到咸共申省

爲北齊檄陳文

盧思道

告三江之表僞署君臣將帥州郡邑落士民等蓋聞上玄垂象列宿拱辰極之忠厚載成形百谷指滄溟之大是以三五以降哲王 后遠覃聲教大輝威靈日月之所照臨俱荷亭育舟車之所通泊咸附象鞮我大齊積德累功開物成務光宅寰海覆幬蒸民虞夏受終顧有慙德湯武革命未云盡善滄波已東九譯請吏玉門之右萬里無塵諸

華冠帶之俗肆勤南畝皮服引弓之渠頓顙北闕內外提福區宇懾然皇上垂拱巖廊司契而已惟夫太伯之後實號勾吳少康之裔是爲干越江界湫湄如掌之陋塗泥所集瘴癘自興自昔皇王列壤班瑞春秋之義爵不過子在晉永嘉運北數極司馬 衆無一旅播越江濱劉蕭已還多歷世祀魏氏奄一神州置之度外且西吞巴蜀北據淮淝善人君子可以爲國陳霸先下愚小醜品極輿隸屬揚部淪胥之日幸梁人殲敗之秋騁其姦回妄自尊大蠻觸之戰爭似鱗鯢之跳躍曇頊昏頑賊忍不義不慈剿厥猶子竊其僞位蜂蠆非毒谿壑易滿事甚楚圍之纓理切吳光之劔國小地狹虐用其民坑戮侔於屠伯芟夷過於薙

氏加以沉迷翹夔醜醜終朝澆灌取盡夜以繼晷貨賄公
行政刑不立踈棄良士狎近小人守宰蠶漁子弟荒暴頭
會箕歛杼軸其空災異相仍稻蟹不熟江左黎獻戴目而
視齊之季世實多涼德江淮之間斃爲項有便謂三眷易
求百年可致違卜悞諫黷武窮兵吳明徹程文秀之徒並
早經行陣粗有風力彼朝上下繫以存立呂梁之役貫盈
惡稔魯未交綏雲卷霧徹組練塞垣鯨鯢噓水顧眄之頃
隻輪不歸及周宣馭曆將一淮海荆舒之民奢侈爲怨聊
命偏裨極其荼毒長江已北若火焚毛是則揚越之地爲
陳孤立卒弊壞蹙邦羸政塞乘奔無轡譬茲非險坐落
待燃方此爲泰司馬消難切疑荷特私任居連率猜狂

酒竊地外犇曇項背恩棄德是信是使引盜納姦無媿無
畏天奪其魄憑犯不悛緣邊諸城犬羊荐食聖主以軒開
萬國屬盡九州一隅不庭宜置天討爰詔六軍分間受鉞
西徵秦龍之銳北引燕代之英五校雄兒超乘俱起三河
猛士援距爭奮虎夫萬隊豹騎千羣並骨勇肉飛風驟霧
合憬彼江黃之衆過矣彭濮之民巨艦高鱸順流東指江
都壽春之域扼喉撫背之兵飛龍赤馬絕水南越漢后昆
明未足方其訓旅魏王玄武不能比其隸師以江湖之泥
短衣祝髮輕舳利舸便習者多陳上迷天意下憑地險所
以舉尾支山怒臂當轅一作轍今荆門銳卒一作士致命前驅
淮南義師賈勇競入揚舲振解疑兔走鳧飛然則彼之所

長我亦兼有我利涉大川匪旦伊夕江郢運遭吳會裔旅
東西遏絕通致無由僞朝軍旅或陳誠欵密使相尋暮爾
危邦表裏携貳兼弱攻昧今也其時扛鼎蒙輪之卒事均
驅兇三禮四義之將晚疑作視韓白正正之旗百道俱進
並雲移雷動大會金陵牙旂暗一作山原金鼓沸天地呼
吸則江漢迴流叱咤則衡疑可拔運岱山而壓春郊引渤
海而濯秋螢當不足等其銷滅譬其蕪粉猥以不武謬摠
戎律上稟廟堂之謀下資素飽之氣使張悌之魂先遊一作
遊北斗呂嘉之級遠至新鄉漂櫓溺駭孱然已至亂麻積
莽可爲寒心僞主若天誘其誠去危轉禍審青蓋之欲歸
知蔣山之應渡衝壁輿觀拜手轅門則上比吳蜀之君不
與公侯之寵陳之百辟鄉士編戶黔庶有能深識逆順
事立功亦當服冕乘軒紆青佩紫疏爵酬庸待以不次王
者之師全救爲本萬姓毫釐靡所侵軼勉求多福無待噬
臍擻之所到咸共申省

此檄述吳明徹及司馬消難事以史考之明徹
呂梁之敗在周宣政元年元一年周已滅齊後
二年消難方奔陳又明年周禪隋開皇元年代
陳文華旣題作北齊又文有我大齊之語未詳
其誤今兩齊字疑皆爲隋當考

爲侯莫陳悅檄陳蕭摩訶等文

案侯莫陳悅西魏末熙三年卒後隋代陳以
侯莫陳穎爲行軍總管悅當作穎

夫文軌未同江湖致阻風雲密邇良用依然肇歲猶寒想
如宜也經始戎務念以勞懷寡人肅稟天策爰征不庭懸
旌秣馬今次楓岸夫時有盛衰運有興滅積德必慶延後
嗣長惡則祚不及遠陳氏往因際會竊有金陵舊項承立
遽相屠害叔寶嗣僞彌復忍虐沉醜日增內荒愈甚雕牆
峻宇加錦綉於土木嚴刑酷法陷人物於塗炭諫士喪身
元良鉗口無道之極自古罕聞有一於此何可不滅斯皆
公等所悉素匪寓言我皇誕膺靈命光臨大寶再闢乾坤
重懸日月歷代逋誅之寇曠古不羈之民感我仁風咸沐
至道唯彼吳越猶未革心主上義存字小含以寬大冀能
撫育彼民守其封域而窮兇極暴日就月將士庶無聊人

神共憤乞師繼軌獻款相尋愍彼黎元實與我後已有別
詔止廢僞主之身此外士民咸從蕩滌西自巫峽東達滄
海巨艦覆波濤樓船出雲霧瓜步六合當心腹之衝渚宮
漢口據上游之勢曲江鎮揚據其要津鐵馬价夫千羣萬
隊攘袂扼腕唯所用之彼國兵士多少備見以寡御衆理
在非敵救首救尾將何以及况復士無鬪心人懷二志身
雖擐甲情在倒戈假使穰苴更生孫武猶在亦不能施其
智畧况異昔日者乎徃者呂梁之師一舉殲滅淮南之地
二旬悉平彼之將帥皆奔走之餘何可用也世疑公早涉
戎旅備經征行安危之勢如近目前得喪之機若觀掌內
以國家今日之盛僞主若猶可全爲其展効容復可爾江

東難立有識同知陳氏必亡賢愚共見天之所廢誰能興
之既無所成徒自傾覆夫毒蛇螫手壯士斷腕豈不惜其
肌骨所存者大也公若轉禍爲福因機立功翻然奮飛共
弘大業則江東士衆免於鋒刃之苦天下生民欣然太平
之世公當位極台鼎福延子孫爰及宗族咸加榮寵豈與
夫不識天命拒我王師舉死扶傷履涉膏血同年共日而
語哉斯皆肝膈至言成敗大理幸非可惑宜早圖之

隋檄陳尚書江總等文

南北雖殊風雲在望載懷虛遲寤寐爲勞獻歲猶寒比當
清豫匡贊乎國良亦慤勤寡人忝膺朝寄董律專征跋涉
山川今次江際公等文儒自立器用適時冠蓋二世

孔老殊教名墨異家金匱朱韜銀編玉策莫不瞻於
舌抄散在筆端邃古成敗之機近代安危之跡照同懸鏡
明若觀火無待指南自應神悟猶恐思之未審差以毫釐
聊煩翰墨略申梗槩自穹昊生民樹之司牧義軒以降書
契可紀咸一姓承立四海無兩帝漢道云季三方鼎立時
惟版蕩世匪休明塗炭起而蜀亡典午興而吳滅永嘉喪
亂紫宸曠主劉石符姚之儔僞夏僭燕之醜妄塵大寶事
乖圖錄魏室乘時兆基朔野經始嵩洛未暇江湖有周受
命敵非齊氏務在兼并不遑外畧葺爾吳越自相君長竊
擬王者之儀妄談天子之氣偷安假息綿歷世紀我大隋
之肇開寶祚光有神州皇帝感曜魄之靈應太微之座千

年啓聖萬代一時深仁至德寧濟羣品越海窮河東漸西
被旄頭之屬歷代之霸作我臣民匍匐服裳唯彼江表獨
隔皇風夫物極則反否終斯泰郭璞有云年經三百天下
大同茲實玄運已定於前聖主膺期而出欲以區區之陳
國違上天之冥數其不可存者一也大必包小天地之常
規明能通暗日月之常理論道德以唐陶而征有苗語衆
寡舉海內而當羣小在長江舟楫之用矜其積習而山川
共有我據上游鼓棹之能吳楚不異高鱸巨舫東西萬里
扼喉撫背水陸千途彼之兵士不過十萬首尾分布所在
危急加以屯戍邊方淹積歲序風雨以爲櫛沐蟻虱生於
甲冑望我寬仁思倒戈戟通在戎行更戍敵國守以待月

則魚爛土崩接以鋒刃則鳥驚鹿走理在必然不假枚卜
此不可存者二也豐侯好酒實喪厥邦梁伯役民潰其宗
社彼之僞主覆車是襲日夜沉湎曾無節度繕造宮室莫
知窮已竭四民之產荒縱其心歛百姓之哀以爲已樂寶
衣玉食填積後宮短褐麤糲不充編戶一芥之善蔑爾無
聞五子之歌宛然悉備雖欲勿喪其可得乎此不可存者
三也僞主忌能護短酷法淫刑骨骸之臣盡見踈斥諫諍
之士皆被屠害遐邇結舌衣冠解體人妖鬼怪觸類呈災
糞齒者年咸知殘滅此不可存者四也以此小邦攝於大
國邊烽夜動照彼都城戍鼓晨嚴震其宮殿累基十二方
此未危懸縷千鈞比斯非切而莫知憂恐更自驕矜曾無

事大之心專行犯上之志侵軼我邊鄙招納我叛亡國家
爰自受命每從含養敦以隣睦申其聘好冀能守彼宗枋
靜其疆域而長惡益甚縱毒彌深吳會雄狡之人湘郢耿
介之士乞師請命盈庭滿闕帝乃憫然矜彼黎獻授鉞推
轂弔民伐罪已有別詔唯廢僞主之身自餘士庶普從肆
向所陳說咸是格言非曰游談共相欺誤且劉叔疑納
譙周之計而獲存孫皓用薛瑩之詞而致福此二子者終
有良臣之譽皆無陷君之譏何則所耻者小所存者大若
憲章徃彥聿遵前軌則爲主享封侯之業祖彌延血食之
期江東士民實受其賜公等身保榮貴名垂竹帛豈不美
歟若膠柱不移守迷莫變率其蟻衆一作聚敢拒王師軍

言不盡意豈復多云楊廣白

文苑英華卷第六百四十五

文苑英華卷第六百四十六

檄二

為李密檄洛州文

為李密檄竇建德文

為竇建德檄秦王文

為李密檄荊陽守郇王慶文

代徐敬業傳檄天下文

為濮陽公檄劉楨文

為李密檄洛州文

後篇作移
郡縣書

祖君彥

自元氣肇改

一作關

厥初生人樹之帝王以為司牧是以義

農軒頊之後堯舜禹湯之君靡不祗畏上玄愛育黔庶

一作

首乾乾終日翼翼小心馭朽索以同危履薄一作春冰而為

一作是懼故一物失所若納隍而愧之一夫有罪遂下車而

泣之謙德軫於責躬憂勞切於罪已普天之下率土之濱

蟠木距於流沙瀚海窮於丹穴莫不鼓腹擊壤鑿井耕田

致之昇平驅之仁壽所一作是以愛之若父母敬之若神明

固能享國多年祚延長久一作世未有暴靈臨人克終天位

者也隋氏往因周末預奉綴衣狐媚而圖聖寶肱篋而一作

以取神器及纘戎一作承負戾狼虎其心始瞋明兩之暉終

干少陽之位先皇大慚侍疾禁中遂為梟獍便行鴆毒於

是罪一作禍深於菑僕釁酷於商臣天地之所不容神明之

所嗟憤一作容人神嗟憤加以州吁安忍閔伯日尋後篇作劍

爾所以懷凶晉陽於焉起亂一作所甸人為罄禮記淫刑

斯逞夫九族既睦唐帝聞其欽明百世本枝文王表其光

大况乃一作復隳壞盤古勦絕後篇維城脣亡齒寒寧止虞

號欲其長久其可得乎其罪一也禽獸之行在於聚麀人

倫之禮一作體別於內外而蘭陵公主逼幸告終誰謂戮音

首舜女弟之賢翻見齊襄之耻逮於先皇嬪御並進銀環一作群飛

諸王子女咸貯金屋牝鷄鳴於詰旦雄雉恣其于一作飛

祖服戲陳侯之朝穹廬同冒頓之寢爵賞之後篇出女謁

遽一作遂成公卿宣淫無復綱紀其罪二也平章百姓一日

萬機未曉求衣曷忘一作不食是以大禹不重一作貴於尺

璧光武無一作不隔於反支體此一作是憂勤深慮幽枉而荒

酒後篇於一作酒俾晝作夜或號或呼一作式呼醉一作嗜

聲伎常居窟室每藉糟丘朝謁罕見其身群臣希覩其面

斷決自爾一作不行敷奏於焉一作停擁中山千日之酒

飲一作酩酊無知名一作襄陽三雅之盃雷連詎比又廣召良

家充選宮掖潛為九市親駕四驢自比商人見邀一作逆

旅殷紂一作之譴為小漢靈之罪更輕內外驚心遐邇失

望其罪三也上棟下宇著于一作易爻茅茨菜椽陳諸史

籍聖人本意唯避風雨詎待珠玉之華寧湏綈錦之麗故

瓊宮一作崇構商辛以之滅亡阿房崛起秦族以之一作

是傾覆而不遵古典不念前車一作廣立池臺多為一作

宮觀金鋪玉戶青瑣丹墀蔽虧日月隔閼寒暑窮生人之

筋力罄天下之資財使鬼尚難為之勞人罔知其一作不可

其罪四也公田所藉一作不過十畝人力所供才一作纔

止三日是以輕徭薄賦不奪農時寧積於人不藏府庫一作

無藏一作而課一作稅繁猥不知紀極猛火屢燒漏卮難滿頭

會箕歛逆折十年之租杼軸其空日有萬一作金之用一作

費父母不保其赤子夫妻相棄於匡床萬邦一作則城郭

空虛千室一作則煙火斷絕一作西蜀王孫之室翻同原

憲之貧東海糜竺之家俄成鄧通之鬼其罪五也古先哲

王卜征巡待唐虞五載周則一紀本欲親問疾苦觀省方

俗乃復廣積薪芻多聚一作養餼年年歷覽處處登臨從

臣疲弊供頓辛苦而飄風凍雨聊竊比於前一作驅車轍

馬蹤一作遂周行於天下秦皇之心未已周穆之意難窮

宴西母以一作歌雲浮東海以一作觀日家苦納結之勤

人阻來蘇之望且夫天子有道守在海外英華夷不亂華

在德非險長城之固一作戰國所為乃是狙詐之風非關

稽古之法而乃追踪秦代版築更興廣營一作基址延袤

萬里遂使屍骸遍一作野血流成川一作積怨比於丘山

一作號哭動於天地其罪六也遼水之東朝鮮之地禹

貢以為荒服周王棄而不臣示以羈縻達其聲教苟欲愛

人非求拓土又強弩末矢不能一作穿於魯縞衝風餘力

非敢一作動於鴻毛石田得而無堪鷄肋食一作而何用

而恃衆怙強一作窮一作兵黷武務在吞併一作不

後篇長策夫兵猶火也不戢則一作自焚遂使億兆夷人

隻輪莫返夫差喪國寔為黃池之盟符堅滅身良由壽陽

一作之役欲捕鳴蟬於前不知黃雀於後一作復矢相

顧璧弟成後篇行義夫切齒壯士扼腕其罪七也直言啓

沃王臣匪躬唯木從繩若金湏礪唐堯建鼓思聞獻替之

言夏禹懸鞞一作時聽箴規之美而乃悞諫違卜妬一作

賢嫉能直士正人皆由屠戮一作左僕射齊國公高穎上

柱國宋國公賀若弼或文昌上相或細柳功臣暫吐良藥

之言翻如屬鏤之賜龍逢無罪遂一作遭夏癸之誅王子

何辜濫被商辛之戮遂令君子結古賢人鉗一作口指白

刃而為一作盛射蒼天而敢欺不悟國之將亡不知死之

將至其罪八也設官分職貴在銓衡察獄問刑無聞賂一作

販鬻而錢神起論銅臭為公梁冀受黃金之蛇孟他薦蒲

萄之酒遂使彝倫攸斃政以賄成君子在野小人在位積

薪居上驗一作汲黯之言囊錢不如傷趙一之賦其罪九

也宣尼有言無信不立用命賞祖義豈食言自獨夫一作

嗣位每歲行幸南北巡狩東西征伐至於一作浩釁陪蹕

東都固守一作闕鄉野戰鴈門被一作圍自外征伐一作

不可勝紀既立功勲須酬爵賞一作而志懷翻覆言行浮

詭臨危一作則勲賞懸授克定則絲綸不行異商鞅之資

一作金同項王之剗印芳餌之下必有懸魚惜其重賞求

其一作死力走丸逆坂譬一作此非難凡百驍雄莫一作

不一作憚忿至於匹夫最爾宿諾不虧况一作在乘輿二三其

德其罪十也有一於此未或不亡况四維不張三空三空

漢陳揔萃一作三無小無大愚夫愚婦共識殷亡咸知夏

滅罄南山之竹書罪無窮决東海之波流惡難盡是以窮

竒災於上國契偷暴於中原三河縱封豕之貪四海被長

蛇之毒百姓殲亡殆無遺類十分之一作計才一作一而

已蒼生凜凜一作咸憂杞國之崩赤縣一作嗷嗷俱愁歷

陽之陷且國祚將改必有常期六百喪殷一作之年三十

終姬之數一作故讖錄皆云隋氏三十六年而滅此則

厭德之象已彰代終之兆先見皇天無親惟德是輔况乃

攬捨竟天申繻謂之除舊歲星入井甘公以為義興兼以

朱雀門燒正陽日食狐鳴鬼哭川竭山崩並是宗廟為丘

墟之狀荆榛是庭旅之事一作宗廟為墟之事夏后一作則

災釁非多殷人則咎徵更少牽牛入漢方知大亂之期王

良策馬始驗兵車之會今者順人將革先天不違大誓孟

津陳盟一作命景毫三千列國八百諸侯不謀而同辭不召

而自至轟轟隱隱如霆如雷雕虎嘯而谷風生應龍驤而

景雲起我魏公聰明文一作神武齊聖廣淵備七德而在躬

包九有一作功而挺秀一作出周大保魏國公之孫上柱國蒲

山公之子家傳盛德武王承季歷之基地啓元勳世祖嗣

元皇英華作皇室之業篤生白水日角之相更一作便彰載誕冊

陵天寶之文斯著加以姓符圖讖一作諱名協歌謠六合所

以歸心三靈於馬一作所以改卜文王厄於羗里赤雀方來高

祖隱於陽山彤雲自起兵誅不道赤伏至自長安後篇作安平非

鋒銳難當黃星英華作屋非出於梁宋英華作苑非九五龍飛之始

大人豹變之初歷試諸難大敵彌勇上柱國司徒東郡公

翟讓功宣締構翼亮經綸伊尹之贊一作左成湯蕭何之奉

一作輔高帝上柱國總管齊國公孟讓柱國歷城公孟暢柱

國絳郡公裴行儼上大將軍左長史邴元真等並運籌千

里勇冠三軍擊劔則斬蛟截鰲一作截蛟斷鰲彎弧則啼一作吟猿

落鴈韓彭絳灌成沛公之基寇賈吳馮奉蕭王之業復有

蒙輪挾輜之士拔距投石之夫冀馬追風吳戈照月一作日

魏公屬當期運撫茲後篇作拯斯億兆躬擐甲冑跋涉山川櫛

風沐雨豈辭勞倦遂興一作起西伯之師將問南巢之罪百

萬軍一作成旅四七為名呼吸則河渭絕流叱咤則蒿華自

拔以此攻城何城不克一作陷以此擊陣何陣不摧譬猶決

滄海而濯殘螢英華作勞舉崑崙而壓小郊鼓行而西一作進百

道俱進一作前以四一作今月二十一日屆於東都而昏朝文

武番守段達常津等昆吾惡稔飛廉奸佞尚一作久迷天數

敢拒義師一作兵驅率醜徒衆有十萬迴洛倉北遂來舉斧

於是熊羆角逐貔虎爭先因爾一作其倒戈之心乘我破竹

之勢魯未旋踵瓦解冰消坑卒則長平未多積甲則熊耳

為少達等助紂一作傑為雲嬰城自固梯衝亂舞徒設九拒

之謀鼓角潛一作將鳴空凭一作憑百樓之險鸞巢衛幕魚遊

宋池殄滅之期匪朝伊夕然興後篇作迴洛虜罕國家儲積我

並一作已先據為日又矣又一作既得迴洛復一作又取黎陽天

下倉廩後篇作倉儲一作之倉盡非隋有四方起後篇作赴義萬里如雲

足食足兵無前無敵裴光祿仁基雄才上畧一作將受命東

專一作征遐邇攸憑安危是託乃識機知變遷虞後篇作既事夏

袁謙擒於藍水張須陁獲在荊陽竇慶戰沒於睢陽一作淮南

郭絢授首於河北隋之亡歿一作侯斷可知也清河公房彥

藻近秉戎律畧地東南師之所臨風行電擊安陸汝穎一作南

則隨機蕩定淮安濟陽英華作淮南則俄然送款徐圓即

已平魯郡上柱國東平孟海公又一作又破齊陰於是海內

英雄咸來嚮應封民瞻取平原之境郝孝德據黎陽之倉

李士才一作雄虎視於長平王德仁鷹揚於上黨滑郡公李

景考功即中房孝基發自臨榆一作俞劉興祖起於北一作白

朔崔白駒自在一作在穎川起房一作方獻伯以譙郡來各擁數

萬之兵俱期牧野之會滄溟之右函谷之後篇東牛酒溢

於軍前壺漿迎一作盈於道左諸君等並衣冠一作世胃杞

梓良材歆神靈澤一作神之秋裂地封侯之始豹變鵠起

今正其時鼉鳴龜應見機而作各宜鳩率子弟共建功名

耿弇後篇之赴光武蕭何一作宗之奉高帝當以一作豈止金章

紫綬軒一作華蓋朱輪富貴以重當年珪璋一作忠真以傳奕葉

豈不盛哉若隋代官人同夫桀犬一作同吠尚荷王莽之

恩仍懷蒯瞶之祿英華審配死於袁氏不如張郃歸曹范

會漢書困於項王未若陳平從漢魏公推以赤心當加好

爵擇木而處幸一作令不自疑脫其猛虎猶與舟中敵國風

沙之民共縛其主彭寵之僕自殺其君高官上賞即以相

授如暗於成事守迷不返崑岡縱火玉石俱焚義等噬臍

悔將何及黃河帶礪明余旦旦之言皎日麗天知我勤勤

之志一作意布告天下一作海內咸使聞知

一作皆舊唐書李密傳

此篇六百八十三卷書門重今已削去

為李密檄竇建德文 房彥藻

公逸氣縱橫鷹揚河朔引蘭山之驍騎驅易水之壯士跨躡燕齊牢籠趙魏好通戎夷聲振華夏昔隗囂之居隴上

非不險也項籍之據彭城非不強也然而援無所恃躬違
歷數遂使楚徒歔歔於垓下秦泥不封於函谷故託身得
地竇融保西河之功協契非人劉表喪漢南之業魏公英
雄電逝類晨風之拂北林率土星奔甚涓流之赴東海今
隋主拘囚於世克身制於朱燦白旗之首已懸烏江之船
未艤去月二十日摠管兵馬會同黎陽莫不投蓋蒙輪賈
勇求敵遠懷歸義分討不庭公能觀火鹿臺在道垂報或
以冀方猶梗願協力齊盟南臨則黃河可清北指則幽雲
自捲公之遠度宏規高勲茂績必將俯盼伊呂吞併韓彭
自餘碌碌復何足數絳灌尚警干戈未戢想軍旅之事各
有司存指縱之勞無疲於明鏡也內懷悃款形於翰墨情

之所寄言不能適

爲竇建德檄秦王文

孔德紹

建德師衆渡河與王世充相援舡運軍糧沂河
而上舡艦相繼首尾不絕水陸並進築城營壘
於成臯之東見號三十餘萬陰令人與王世充
相約乃遺秦王書

夏王敬問唐秦王彼朝發跡太原奄有關內鄭氏光啓伊
洛崇建宗社予則創基燕趙包舉山東鄭國何辜興師致
討深懷固存不憚縑足方今千乘雷動萬騎雲屯投石拔
距蒙輪擊劔統三燕之義勇驅六齊之雄傑制勅敵如拾
遺殄高墉若摧朽鄭都鞠旅誓衆雪讐我師躍馬礪戈克
蕩氛侵彼則外無救援內絕軍糧將聽楚歌之聲方見嶠
陵之哭若能反鄭國之侵地守秦川之舊邦更脩前好不

車來請

為李密檄榮陽守郇王慶文

魏徵

見隋書郇王慶傳

密既屯鞏洛東得黎陽河南郡縣莫不響應唯榮陽不下王即隋之宗室故鄭疑密以一城之地不足以動大兵先命行人開陳禍福

早挹芳猷未諧披展甚為翹佇興寢增勞寒勢轉嚴比得

清吉及處危城無乃憂悴自猜隋書狂嗣位多歷歲年剥

削黔黎隋書作生民塗毒一作炭天下瓊室瑤臺之麗未極驕奢

糟丘酒池之荒非為淫亂加以違忠臣之諫從婦人之言

殺戮忠良一作多科稅無已是以鬪毛而起豹變其文共舉

義旗同隋書剪凶霍今者屯營鞏洛開發太倉賑恤饑羸

咸從克捷吳戈電照隸首箠而無窮冀馬雲屯弘羊計而

難盡是以八方並湊隋書同德萬里俱來莫不期入關以亡

秦爭度河而滅紂東窮海岱南泊江淮凡厥遺黎隋書承

風慕義唐公起兵黎疑作晉陽兵一作軍臨灞岸三秦父老千

里犒師叶義同心共為犄角元寶藏武陽興義即取黎陽

燕趙之郊來蘇成詠唯榮陽一郡仍隋書獨守迷愛疑以

宗盟尚疑啣璧敬陳鍼藥冀愈膏肓夫微子紂之長隋書作元

兄親隋書寔為重項伯籍之季父戚乃非踈然其隋書去

朝歌而處周背西楚而歸漢豈不眷戀宗祊留連骨肉但

為識寶鼎之遷隋書移知神器之先改河決不可壅樹顛

不可維所謂玄覽通人明鑒君子者矣而王之先代家住

山東本姓郭氏乃非楊族只隋書為止為宿與隋朝頗隋書有

文苑英華

勳舊遂得預沾磐石遂隋書作名在葭葦婁敬之與漢高殊非

血胤呂布之於董卓良異天親芝焚蕙歎事不同此又王

之昏主心若虎狼儲忿同飽乃甚隋書作有逾沉闕惟勇及諒

咸罄記作罄甸師魏文之毒任城漢武之鳩河獻假使宗桃

是一疎不問親况乃族類為非有何疑阻隋書作何能自保王之

為臣無所獻納不能曲突徙薪餘煩去惑致令四海昇沸

百姓亂麻高壘深溝自固而已藩屏之寄豈若是乎欲免

大責其可得也為王計者莫若舉城從義開門送款識機

知變足為美談乃至子孫長守富貴十六字隋書作安若太山高枕而卧長守

富貴足為美談乃至子孫必有餘慶今王世充屢被摧破偷存漏刻段達守

東都窘迫自救無聊隋書作今王世充屢被摧蹙自救無聊偷存畧刺詎能支久段遠韋津東

自守何世充朝亡彼隋書作達便夕死又東都荒酣酒色六

隋書作江流洄忘歸內外崩離人情隋書作神怨憤上江未船

皆被抄截士卒饑餒半菽不充事切折骸義均煮弩舉烽

火於驪山諸侯莫至浮膠船於漢水還日未期近得朱粲

啓詞銳師百萬以破襄陽惣帥熊羆沿流東下尅期指日

定滅江都分項籍於五侯切王莽於千段王獨守孤城援

絕隋書作絕援千里餓糧之計僅有月餘獎卒之多才隋書作絕盈

數百何以隋書作何恃賴欲相抗拒飛隋書作求枯魚於市肆即

是未遙因歸鴈以運糧竟知何日然城中雄隋書作豪傑王之

腹心思殺長吏將為內應隋書作啓只恐禍生七首纍起隋書作發

蕭墻枉隋書作空以七尺之形隋書作軀徒隋書作懸償千金之購可為

寒心可為酸鼻者也今龜豹百萬馬首欲東唯待王世充

破了鼓行東邁梯衝亂舞鼓角潛鳴笑虜叔之死馬疑作

傳削在隋屬嚴一也悲襄陽疑作城漢書之雉類南陽首

疑作守 齟封侯之事杳然東門遂獵臨刑之歎何晚深相愛

惜裂帛裁書幸可三思自求多福慶得書懼召父

代徐敬業傳檄天下文 駱賓王

為臨朝豺豕行武氏者集本文粹並作人非和順唐

書作地實寒微昔充太宗下陳曾唐書以更衣入侍泊乎

晚歲諸書穢亂春宮密文粹隱先帝之私陰圖後房唐書

之嬖入門見嫉蛾眉不肯讓人掩袖集作工讒狐媚偏能

惑注踐集作元后於暈翟陷集作吾君於聚麀加以虺蜥

為心豺狼成性近狎邪僻殘害忠良殺嫡集作屠兄殺君

醜母人神之所同集作嫉天地之所不容猶復包藏禍心

窺竊神器君之愛子幽之于唐書別宮賊之宗盟委之以

重任嗚呼霍子孟之不作朱虛侯之已亡燕啄皇孫知漢

祚之將盡龍漦帝后識夏庭之遽衰欝業皇唐舊臣公侯

冢胤奉先君之成業荷本朝之舊文粹息宋微子之興悲

良有以也袁君山之流涕豈徒然哉是用氣憤風雲志安

杜稷因天下之失望順宇集作內之推心爰舉義旗誓文

以清妖孽南連百越北盡三河鐵騎成群玉軸唐書相接

海陵紅粟倉儲之積靡窮江浦黃旗匡復之功何遠邊唐

作聲動而北風起劔氣衝而南斗平喑鳴則山岳崩頽叱

吃則風雲變色以茲一作制敵何敵不摧以此圖功集作

攻何功一作城不克公等或居漢地或叶周親唐書作或家

叶周或膺重寄於瓜牙或受顧命於宣室言猶在耳忠豈

忘心一杯之土未乾六尺之孤安在文粹在何託儻能轉禍為

福送往事居共立勤王之功文粹作無廢舊文粹作君之命凡

諸爵賞同指唐書作裂山河若其集作眷戀窮城徘徊岐路坐

昧先機之兆必貽後至之誅請看今日之城中復文粹作竟集作

合是誰家之天下移檄州郡咸使知聞

為濮陽公檄劉稹文集作李商隱

足下前以肺肝布諸簡素仰承復命猶事枝詞夫豈告者

之不忠抑乃聽之而未審擇福莫若重擇禍莫若輕一去

不迴者良時一失不復者機事噫嘻執事誰與為謀延首

北風心焉如灼是以再陳禍福用釋危疑言不避煩理在

易了丁寧懇款至于再三者誠以某與先太師相國俱沐

天光並為藩后昔云與國今則親隣而大年不登同盟英華

作門未至飯具纔畢綈衣莫陳乃睠後生遽乖先訓遷延

朝命迷失臣職不思先轍左傳作之忠將覆樂書之族此僕

隸之所共惋集作兒女之所同悲况某擁節臨戎援集作

旗誓衆封疆甚邇音旨猶存忍欲賣之以為已功間之以

開戎後將祛未寤欲罷不能願思苦口之言以定束身之

計昔先太尉相公常蹈亂邦不從逆命翻身歸國全家受

封居韓之西為國之屏棄代之際人情帖然太師相公集作

國以早副軍牙久從征旆事君之節已著居喪之禮又彰故乃集作前獎其象賢仍以舊服納職貢賦十五餘年於我

唐爲忠臣於劉氏爲孝子人之不幸天亦難忱纔加壯室之年奄有壞梁之歎主上深固義烈是降優恩蓋將顯足下之門爲列藩之式不欲劉氏有自立之帥上黨爲辜恩

集作姑息之軍俾之還朝以聽故集作復命其義甚著其恩莫偕

昨者祕不發喪已踰一月安而拒詔又歷數旬祕喪則於孝子未聞拒詔則於忠臣已失失忠於國失孝於家望此用人由茲保族是亦坐薪言秦巢幕云安智士之所寒心謀夫之所辭舌矧於僕者得不動心竊計足下之懷執事之論當以趙氏傳子魏氏襲侯欲以逡巡希恩顧望謀立

耳夫事殊者趣異勢別者跡暌胡度其始而議其終舉其華而尋其實願爲足下一二而陳之趙魏二侯於其先也親則父子於其人也職則副戎賞罰得以相參恩威得以相抗故朝廷推而與之今足下之於太師也地則相近職非副戎賞罰未嘗相參恩威未嘗相抗稽喪則於義爽拒詔則於事乖此趙魏二侯信事殊而勢別矣此施之於太師趙魏則爲繼代象賢之美施之於足下足下則爲自立擅命之尤得失之間其理甚白又計足下未必不恃太師之好賢下士重義輕財吳國之錢徃徃而有梁園之客比比而來將倚以爲墻藩託以爲羽翼使之謀取使以數求細而思之此又非計山高則羝羊自至泉深則沉玉自來

已立然後人歸身正然後士附語有之曰政亂則勇者不
爲關德薄則賢者不爲謀故吳淠有奸而鄒陽去燕惠無
德而樂生奔晉寵大夫卒成分國之禍衛多君子孰救渡
河之裁此之前車得不深鏡代憲四祖文明繼興當時燕
趙中山淮陽齊魯連結者幾姓旅拒者幾侯咸逆天用人
皆惠忘德據指掌之地謂可逃刑倚親戚之私謂能取信
一旦地空家破首裂支分闇者不能爲謀明者固以先去
悔而莫及末如之何先太尉與李洧尚書齊之密戚楊太
保與蘇肇給事蔡之懿親並據要地方州領精甲銳卒及
其王師戾集作蒞非止我武惟揚則割地驅人以降送款輸忠
以入非不顧密戚非不念懿親非不思恩非不懷惠直以

逆順是逼死生實難能與其同休不能與其共戚故也况
足下大未侔齊蔡久未及李吳將以其人動於不義僕固
恐夙沙之國縛主之卒重生彭寵之家不義之侯更出又
計足下當恃太行九折之險部內數州之饒兵士尚強倉
儲且足謂得支久謀而使安危哉此心自棄何速昔李抱
真相國用彼州之人破朱滔於燕國困田悅於魏郊連兵
轉戰綿歲經時而路人夫死不敢哭子死不敢悲何者李
相國奉討逆之命爲勤王之師義著而誠順故也及盧從
史釋喪就位賣降冀功將乘討伐之時欲肆克邪之性計
未就而人神已怒事未立而兵衆已離以萬夫之長困一
卒之手驅轡北闕棄屍南荒而路之人猶老者捫背少者

扼腕謂朝廷不即顯戮深為失刑其故何哉以從史不義
不暱去安就危衆黜其謀下不為用故也二師去就非因
傳聞鳩杖之人貽背之叟知其本末尚能言之則太行之
險固不為勃疑作恃者之守數州之衆固不為邪者之徒此
又其不足恃也由此言之則何以敗名譽六字集作則以何名隳家
聲何事捨君命何道求死士何計得集作固人心此僕者所
以對按忘食推枕不寢為足下惜為足下危而不知其所
以然也况太師比者養牛添卒畜馬訓兵旁招武幹之材
中舉將軍之令然而輕集作聽於遠近頗有是非雖朝廷推
赤心弘大度然而不逞者已有乖異集作異圖之說橫義者屢
興悖惡之歎人之多言亦可畏也誰為來者宜其弭之今

足下背季父引進之恩失大朝文誥之令則是實先太師
之浮議彰昭義軍之有謀為人姪則致叔父於不忠為人
孫則敗乃祖於無後亦何以對燕趙之士見齊魯之人耶
又計足下旬日之前造次為慮今茲追改懼有後艱此左
右者不明而咨詢之未盡也近者李尚書祐董常侍重質
之輩並親為賊將拒我官軍納質於匪人效用於戎首又
乃來復尚蒙殊恩皆受郡符咸領旗鼓不能悉數厥徒實
繁豈有足下藉兩代之餘資弄集作委數萬之舊旅俛首聽
命舉宗効誠則朝廷又豈以一日之稽遲片辭之疑異而
致足下於不測沮足下於後至集作圖故事具存可以明驗
幸請自求多福無辱前人護龍旄以歸洛師秉象笏而朝

魏闕必當勲庸繼代富貴通身無為隣道所資使作他人
之福儻尚淹歸款未整來軒集作戎臣鼓勇以爭先天子

赫斯而降怒金瑛一受牙璋四馳魏衛壓其東南晉趙出

其西北拔距投石者數逾萬計科頭擊手者動以千許兼

驅挽虎唐之材官仍率射鵬之都督感義則日月能駐拗

憤則砂石可吞使兵用火焚城將集作水灌魏趣邢郡趙

出洛州分二大都之間是古平原之地車甲盡輸於此境

糗糧反聚於他人恃河北而河北無儲倚山東而東山不

守以兩州之殘集作殍抗百道之奇兵比累郊而未危寄

孤根於何所則老夫不佞亦有志焉願驅敢死之徒以從

諸侯之末下飛狐之口入天井之關巨浪難防長飈易扇

此際必當驚地底之鼓角駭樓上之梯衝喪貝躋陵飛走

之期既絕投戎集作散地灰釘之望斯窮自然麾下平生

盡忘舊愛帳中親信即起他謀辱先祖之神靈為明時之

哂集作笑靜言其漸良以驚集作魂今故再遣使車重申

丹素惟鑒前代之成敗訪歷集作事之賓寮思反道敗德

之難念順令畏威之易時以吉日蹈茲坦塗勿餒劉氏之

魂勿汗潞人之俗封帛增款含毫益酸延望還章用以上


表戎敗之舉慎惟圖之不宣河陽三城節度使王茂元頓

首

文苑英華卷第六百四十七

露布一

露布二卷英華所編
失年代先後今正之



兵部奏姚州破賊楊虔柳等露布一首

兵部奏姚州破賊設蒙儉等露布一首

為建安郡王武攸宜等平冀州賊契丹露布一首

為幽州長史薛楚玉破契丹露布一首

兵部奏姚州破逆賊諾沒弄楊虔柳露布

駱賓王

尚書兵部臣聞北辰

集作

列象六合奉天子之尊南面秉

乾一統成聖人之業是知衣裳所會義有輯於殊隣霜露

所均誠兼育於異類故塗山萬國誅後至者防風丹浦一

戎緩

集作緩

前禽者就曰然則陳

集作利

孤矢以威天下法雷

霆而

集作以

震域中四時行焉天道不能去殺五兵備矣皇

業所以勝殘雖事切救焚苟順時而濟物恩深祝網不獲

已而用兵伏惟皇帝陛下登翠媯以握圖憲紫微而正象

玄功不宰混太始以凝神至道無名佇華胥而得夢闡文

教以清中夏崇武功以制九夷環海十洲通波太液之水

鄧林萬里交影甘泉之樹反衝穿宵之域襲官帶以來王

竒肱儋耳之酋奉正朔而請吏逆賊蒙儉和舍等浮竹遺

胤沉木餘苗邑殊禮樂

集作義

之鄉人習貪殘之性日者皇

明廣燭帝道遐融頗亦削左袵而被朝衣解推髻而昇華

冕而豹狼有性梟獍難馴遂敢亂我天常率九種

集作九

後漢乃哀牢夷之先也

而背誕負其地險携七部以稽誅搔動

集作亂

邊疆寇

集作欲

攘州縣

集作郡

是用三門授律長驅無戰之師

五月渡瀘深入不毛之地去月二十一日軍次三臯崑崙

鎮前後捕得生口知守捉山羌傍山連結十部蠻首徒五

萬衆此山即南郡中之巨防也岡蠻千里西通大荒之外

集作郊

谿谷萬重南極炎洲之境聳喬林而插月陰兔

集作靈

有微道之標拔崇巖以隱天陽烏無迴翼之地峯危束馬

路絕懸車賊據臨岱

集作代

之形乘建瓴之利

集作勢

徵風召

雨蜎起蜂飛驅雜種以挺妖

集作災

封狐千里肆沉黎而作

孽雄虺九頭臣以為制敵以權柔遠者理或存於德教伐

叛以義決勝者不必在於干戈於是廣布朝恩恭宣帝德

申之以安撫曉之以存亡信重蠻陬無負黃龍之約賞隆

漢爵不踰白馬之盟地接冉見司馬相如踰蜀文集作周非駝詞屢殫於

喻蜀俗通盤瓠聲不輟於吠堯臣遣左三集作二軍子惣管

寧遠將軍前守右驍騎萬安府長史拆衝都尉上柱國劉

會基率檢校果毅驍騎尉井陘縣開國男劉玄暕等嚙枚

遠襲卷甲前驅偃危旆而設潛兵疑從天落乘間道而掩

不備似集作君出地中又遣右三集作二軍子惣管明威將軍

行右集作左武衛翊府中即將上柱國高奴弗率左武衛天

水府拆衝都尉張仁樣集作操等涉集作跋南山之南衝其要

害之路又遣左一軍子惣管前右金吾衛翊府左即將上

柱國孫仁感率衛尉府右集作左果毅都尉王文雅等陵北

山之北絕其飛走之途賊首領楊虔柳諾沒弄諾覽斯等

振螳螂之力拒轍當輪肆集作縱蚊蚋之群彌山滿谷劉會

基高奴弗孫仁感等並忠勤克著智畧遠聞識明君之重

恩輕生有地提大阿之雄集作神劔視死無時彎弧而克黨

土崩舉刃而妖徒瓦解雖危若見荀子英華作帖危沸鼎未窮梟首

之誅救死扶傷猶致拆骸之請二十二日臣遣副總管兼

安撫副使定遠將軍前左驍騎翊府中即將令狐智通率

右武衛良將壯府左果毅都尉韓惠德等擁貔豹之雄順

天機而右集作左轉遣管内安撫副使朝議大夫使持節守

銀州剌史上柱國宜春縣開國李太志卒前左武衛靜初

府右果毅都尉上柱國陳弘義等驅集作卒象犀之卒乘地

軸以右迴又遣行軍司馬朝散大夫守雋州都督府長史

上柱國梁待璧集作率守右金吾衛宜昌府果毅都尉閻

文成等摠投石拔距之村蹈中權而拊其背又遣前守右

威衛龍西府果毅都尉康留買等騰躍鉄歎金之騎犯前

矛集作而扼其喉臣等卒守左衛清官府左果毅許懷秀

等橫玉弩以高臨縱金鉦而直進玄雲結陣影密西郊赤

董揮鋒氣衝南斗颺煙塵集作而匝地白日為之晝昏積

氛侵以稽天蒼冥為之晦色兵交刃接鳥散魚驚自卯及

申追奔逐北斬首千餘級轉戰三千里激流膏而為泉似

變萇弘之血委亂骸而擠壑若沉鼈令集作之屍既而

照盡高春雲昏乙夜賊乃收集餘眾深集作擄重巖臣度

彼遊魂慮其宵遁使三軍齊進四面合圍二十三日乘魚

爛之危啓蛇形之陣揚麾誓眾杖節訓兵一鼓先登賞必

懸於芳餌九攻失律罪無救於嚴誅五都集作材雄三河

俠少或生居燕地尤工即墨之圍或家本秦人早習昆明

之戰叱咤則江山搖蕩慷慨則林壑飛騰舉鵬翼集作以

揚威耀群渠而賈勇澄氛廓侵回夏景以潰春冰滅跡掃

塵若霜風之卷秋穉戰踰百里時歷三期前後生擒四千

餘人斬首五千餘級諾沒弄楊虔柳等殞死集作行陣懸

首旌門蒙儉和舍等委眾奔馳脫身挺險雖復刑以止殺

丁壯咸伏於誅夷禮不重傷班白必存於寬宥昔魏成伐

集作蜀徒聞葑醬之奇漢使開邛纜通行杖之利豈若膺

紫泥而弔伐指丹徼以臨戎一戰而孟獲已擒再舉而哀

軍授首斯顯皇威遠暢廟畧遐宣奉玄德集作以配天徒

知帝力掩黃集作與而關集作地豈曰臣功無任集作慶

快之誠集作謹遣某奉露布以聞軍資器械別薄條上

兵部奏姚州破賊設蒙儉等露布 前人

臣聞七緯經天星墟分張翼之野八紘紀地炎洲限建木

之鄉曲距大秦雜金莖而孕氣南通交址枕桐柱以為隣

倍帶白狼人習貪殘之性河淪赤虺川多風雨之妖水積

炎氛山涵毒霧竹浮三節肇興外域之原木化九隆頗為

中國之患年將千祀代歷百王鄭純之化不追孟獲之風

逾扇故三年疲衆徒聞定管英華作之譏五月出師未息

渡瀛之後然則大人拯物上聖乘期法乾坤以握樞體

桑而建極知仁義不能禁暴設刑網以勝殘知揖讓不可

濟時用干戈而靜亂伏惟皇帝陛下神摛載玉集作祥出

集作地軸以登皇道契書集作繩掩天紘而踐帝玄雲入

戶慕靈慶集作於丹陵蒼籙集作昇壇薦禎圖於翠渚垂

衣裳以朝萬國崇玉帛而禮百神昭儉防奢露臺惜中人

之產宣風布政明堂法上帝之宮致群生於太和登品物

於仁壽四神踐雪五老飛星君囿祥麟樂班文於先樂集

卉女牀鳴鳳韻歸昌於帝梧四隩同文五風異色配林萬

里纔疏苑囿之原集作層城九重未浚集作池隍之域合

壁集作照臨之地候月歸琛大鑪覆載之所集作占風納

畫蠹茲夷

集作

貊敢亂天常橫赤標

集作

以疏疆背朱提

而設險石林萬仞巖邑千重

集作

望秦阜以相傾峻陵失

四塞之阻對梁山而錯峙劔門成一簣之峯自謂絕壤幽

集作

荒中外足以迷聲教憑深負固江河

集作

可以逃靈

誅殊不知玉弩垂芒涵

集作

水無九嬰之珍瑤階舞咸洞

庭有三苗之墟臣等謬以散材忝專分間白招乘候順秋

集作

官以揚旌絳節臨邊通夜郎而解辦自營開雋穴施

轉邛山峻岐折坂之危盡亡衿帶滇池漏江之固曾失藩

離唯逆賊設蒙儉等未革狼心仍懷豕突陸梁放命旅拒

偷安地

集作

接祠雞竟無心

集作

於改旦山多神鹿終未

息於擇音

英華作陰杜預注

臣以大帝宣威有征無戰明王杖順

先德後刑弘

集作

聖澤於中孚緩天誅於大造庶南薰解

愠仰雲關

集作

以翔魂東律和

集作

音扣轅門而啓

集作

頽祝禽踈網徒開三面之恩毒虺挺妖愈

集作

肆九頭之

暴乃鳩集餘衆蟻結兇徒儋耳椎髻之渠千里霧合鑿齒

雕題之孽一呼雲屯壘

集作

石菌以開營拒巖椒而峻壘

崇蠻切漢若登藏寶之山絕壑憑霄似瞰封泥之谷去前

月十七日連營布陣擣

集作

險陽兵東西三十餘里馬步

二十餘萬聚蚊蚋而合

集作

響聲若雷霆縱蛇豕以為群

氣稽宇宙臣遣中郎將令狐智通等擁拔山超海之師當

其步陣遣銀州刺史李大志等以

集作

躍景騰雲之騎乘

其馬軍遣雋州都督府長史行軍司馬梁待壁

集作

等領

勁卒二千絕其飛走之路遣臨源府果毅馬仁靜等勒精
兵九百斷其潛伏之軍臣率行軍長史韓餘慶等負霜戈
而直指掃雲陣以長驅庶令斬馘七擒將士挾雷公之怒
伏屍百里死作蠻夷識天子之尊集作威於是三略訓兵五申
誓衆先登陷敵唯標集作無遺大樹之功後拒亂行必致曲梁
之罰楚人三戶蜀郡五丁氣擁玄雲精貫白日暗鳴則乾
坤搖蕩呼吸則海岳集作林壑沸騰列旗影以雲舒似長虹之
東指橫劍鋒而電轉疑大火之西流及接兵交洞宵達臆
自辰踰午魚爛土崩沸殘息於層峯更切守陴之哭積圓
顛於重阜殆成京觀之形集作封唯賊帥夸干未悟傾巢之
兆敢懷拒轍之心猶集作獨率馬軍平川轉鬪驚塵亂起六

合爲之寢光殺氣相稽四溟爲之集作由是變色副總管李大

志忠惟徇國義則忘軀臨危而貞節愈集作逾明制敵而機

謀集作神機獨遠卅誠自守雖九死其如歸白刃交前豈三軍

之可奪投袂則妖徒霧廓舉旗而逆黨冰摧集作堯於是

乘利追奔因機深入困獸猶鬪似化集作戰廩君之魂窮鳥

尚飛如鷲杜宇之魄斬甲卒七千餘級獲裝馬五千餘疋

僵屍蔽地集作野臨赤坂而非遙流血洒途視卅徼而不集作

何遠首領和舍等並計窮力屈面縛軍門寬其萬死之誅

弘以再生之路唯蒙儉脫身挺險委集作負命窮山顧巢穴

以集作而靡依延集作逃晷漏其集作而何機况妖徒革面荒集作

徼外非復他人部落離心舟中皆爲敵國瞻言梟首指日

可期凡所歸降隨事招撫與之更始復其故業首丘懷戀

疑臨舊國之墟安堵知歸集作識家似入新豐之市集作邑然後

班師遯水振旅禹山建鴻業集作勳於武功暢玄猷於文教

庶荒陬襲中邦集作原之禮邊疆息外寇集作戶之虞華人一作

封祝堯兆皇基於千歲集作載夷歌頌漢美王澤於三章宜

與夫天帝前星廣賜秦公之冊坤元益地遙開王母之圖

蓋示有云曾何足紀斯並玄謀廣達集作運妙畧遐覃一戰

戎集作而荒景肅清再鼓而邊隅底定豈臣等提戈擐甲克

全百勝之功杖節楊麾能通九變之策謁藁街而獻捷集作

旅大帝成規聞杖杜以勞還小臣何力不勝慶快之至謹

遣行軍司馬朝散大夫守嵩州都督府長史上柱國梁

瑩集作辟奉露布以聞軍資器械別簿錄上

為河南郡王武懿宗集作為神兵道平冀州賊契丹等露

布按新唐書神功元年武懿宗為神兵大總管計契丹一本作建安郡王武攸宜作

張說

大總管右金吾衛大將軍兼檢校洛州長史河內郡王臣

某前軍總管行左衛翊府中郎將上柱國定陽郡開國公

臣楊玄基行軍長史朝奉大夫守給事中護軍臣唐奉一

行軍司馬通議大夫行天官郎中臣鄭果等言臣聞氛祲

薄霄戎狄謀夏則武庫兵動中國有孤矢之威文昌將飛

邊城用金革之事蓋以式遏姦暴大庇黎人震蠻蕩夷明

罰耀武者也伏惟天策金輪聖神皇帝陛下仁覆有截化

被集作無外皇圖未臣之黨先帝集作不庭之倍罔不依

被聲教浸潤邕集作熙望雲向風密邇遐裔而契丹克醜

奴隸餘集作苗非冒集作頓之雄族異單于之貴種徒以

錯居遠郡漸化平時田牧混於四疇貿遷通於三市集作

戍人集作解甲邊馬垂轡禽獸飽而忘恩蜂蠆養而恣集作

成毒敢孤亭育自絕生成乃狼心干紀鴟誼竊發虐我邊

吏覆我鎮軍大棘殘於夷落孤竹淪於荒虛集作陛下震

赫斯之怒授決勝之符天地合謀鬼神助伐六狄舉國百

蠻整衆運攬捨而掃除從裂集作缺而焚蕩臣飲水受斧

指日揚麾雖謝河間之學竊慕任城之勇誓將首冒鋒刃

躬先士卒上假神兵之威下定鬼方之罪凶醜狂悖素無

大志因乘便利扇動姦回集作去歲嘗師疑一軍之盡化

今春輕敵見三帥之不歸蟻聚寔繁豺牙益厲結山戎以

四集作寇連島夷而深集作入臣乃廣開形勢大振軍聲

集作移告郡邑金湯固守傳檄諸軍掎角相應清邊道大

惣管建安郡王攸宜杖鉞薊門作鎮幽集作國當要害之

地挫犬羊之群高壘深溝臥舊集作營而不動山蛇雲鳥

陣死地而無疑惣管沙吒忠義王伯禮安道買等兵臨易

水使接桑河犀渠衝將集作士之冠集作雕騎落集作將

軍之戰集作四面當敵集作九拒乘城御史大夫婁師德

惣管高再集作牟薛思行扞敵中山折衝外侮訓厲鷹揚

之士輯穆震驚之師其餘部散校分集作離綱集作別

緒兵車星布巡太行而綴碣石介馬雲羅挾衡漳而連海

浦山川積雨盡集作消胡騎之塵草木長風咸有王師之

氣清邊士馬稍南驅而擁蹙神兵甲卒漸北逐以威臨但

合圍而持重未輕挑而即戰重以藩臣默啜統率氍裘控

弦逾於萬騎帶甲彌於千里長驅松漠掩集集作柳城巢

穴是空胎卵皆覆于時賊衆兵馬屯逼幽州聞其塞外之

敗懼有舟中之敵勢力外窘心服內垂建安郡王攸宜蓄

銳淵唐諱停乘機電發援桴作氣則山岳動搖書箭一飛則

酋渠相滅兵纜接刃元兇授首春喉蔽野驚觀起於中州

積甲成山組練收於外府雖本根斯拔已蕩滌於一隅而

餘蔓所集作滋尚聯延於數刻集作賊師何阿小等頑凶

是極奢僧為資授其署置肆行驅集作掠幽陵之下不知

首惡之已擒兩河之間仍謂遊魂之可恃士女遭其逼脇

軍城集作被其屠陷以殺戮為事戶積戾劉之悲以劫奪

為心家盈剝割之痛鹿城縣令李懷璧衣冠貴胄令長崇

班背我朝恩歸城狄寇潛修甲杖輸以利噐之資見委兵

權當其上將之任蠢茲狂亂暫集作同燎火言事剪除方

申沃雪自河小至沃雪以上倉臣乃盛兵邢趙塞井陘之

隘命虎賁之將遏其衝突之鋒長史唐奉一馳使洛魏據

阿曹之津縱羽林之雄挫其侵軼之勢臣又遣將軍惣管

忠武將軍行左衛翊府中郎將上柱國定陽郡開國公楊

玄基押飛騎營中郎將李鐸子惣管雲麾將軍行玉鈐衛

翊府中郎將康國公阿史那毗伽子惣管冠軍大將軍行

左玉鈐衛翊府中郎將宋拔延子惣管冠軍大將軍行左

金吾衛翊府郎將迴鵠集作果別勅行人雲麾將軍康戡

誕子惣管定遠將軍左威衛長李當義壯武將軍何義本

子惣管忠武將軍何集作利深子惣管壯武將軍俱羅羅

淮宣威將軍行左玉鈐衛翊府郎將蘇達侯一作斤度施

子惣管定王府典軍成善威子惣管押飛騎定遠將軍平

原府左果毅長上穆仙童子惣管劉尚珪子惣管涓川府

左果毅鹿思讓押飛騎左玉鈐衛隊正長上賈楚珪左鷹

揚衛長上花匡鼎押飛騎李言忠押飛騎沮忠揚鎮副張

元敬押飛騎康景休押飛騎左監門衛司戈竇九臯別奏

右武威衛長上楊仁爽左武威衛長上楊裔原州崇固鎮

副康戍一作子右監門衛長上傳阿毛左監門衛長史殷

承範右衛長上王仁獎右衛執戟嚴弘琰右金吾衛羅元

讓潭州花石戍王蘇元暉前右武威衛長鄭嘉祥左衛司

戈鄭彥湊媯州威寧戍主崔思暎押步兵子惣管左玉鈐

衛長上張中儼別奏首領蘇農婆羅三品子首領宋義本

別奏游擊將軍左玉鈐衛宿衛哥咄施注比別奏鄭思疾

左衛潞州府果毅員外置同正阿史餃子惣管王城府檢

校果毅任弘誓別奏檢校虞候任虜寂別奏裴光嗣等徇

其東北又遣子惣管游擊將軍玉鈐左司階伏羗縣開國

男李弘頽子惣管邢州司戶叅軍飛鳥縣開國男常元楷

男李弘頽子惣管邢州司戶叅軍飛鳥縣開國男常元楷

子惣管原州廣牧領將軍元寂子惣管右武衛員外置同
正武元禮子惣管前潞州叅軍武其別勅行人張景扶州
刺史舊鎮副崔敬一右武衛中即將阿史德奉職右鷹威
衛將軍業恤吸刺俟斤右豹韜衛柔遠府長史上果毅吐
火羅決斯右金吾衛果毅執失守直右鷹揚即將員外置
同正阿所那左玉鈐衛長上借緋金元濟東天竺國王子
僧伽杖摩右鷹揚衛即將僕固郡骨支左金吾衛即將阿
康地具右武衛威即將東河察使左豹韜衛高城府長上
果毅阿史德伏摩支右玉鈐衛即將路驢駒左金吾衛長
上阿史德伏摩支右玉鈐衛即將路欲谷游擊將軍葛羅
枝延游擊將軍契苾木昆拆衝都尉車臯施俟斤虔州道

口鎮副白善德晉州仁壽府果毅侯義威子惣管左武威
衛侯神城府果毅杜玄隱押後隊長上張德峻天官常選
王嵩常彥緯押千騎三交戊董玄景河州安喬戌主王才
龕別奏康玄寂押千騎隊楊待封前冀州堂陽縣丞温待
禮別勅行人白君晉等略其西南或拆衝其前或乘躡其
後整貔貅之佐奮猛毅集作勇猛之倫長戟林迴高旗雲繞賊
黨窘窮漏急命窄途殫執無全支心投必死之計以今月
一日何阿小等帥不悛之旅擁脇從之衆結聚數萬抗拒
官軍自寅及午前後九陣玄基等並鋒鏑爭先戈鋌遞躍
抗足而趾鮮卑之血塗地攘臂而扔人蒸切因也烏丸之首積
野摧同氷陷裂若山焚窮其子遺無復噍類斬獲逆賊冀

州三品大惣管何阿小逆賊河北道招慰大使冀州刺史
馬行感逆則冀州道副大惣管楊奉節逆賊冀州長吏王
弘胤逆賊惣管劉伏念逆賊十二衛大將軍見任鹿城縣
令李懷璧逆賊信都縣令楊志寂惣管胡六郎逆賊惣管
王知先逆賊帥馬明誓逆賊三品惣管姬目等魁首巨蠹
三百餘人所有戎羯憑陵殘毀之處臣皆宣布制旨撫集
其人咸懷聖恩俱得復業群凶既定冀集作四方砥平二載
逋誅一朝泯滅數州然毒俄然集作爾清弭舞溢河冀歌達
塞垣截風浪以息滄溟廓氛埃而觀白日卻穀獻集作何力
敢推群帥之勞叔向有言實在明君之德臣憑藉睿略忝
當戎政神機密運不待橫草之功天贊冥符恭承破竹之

勢伏惟

集作瞻

廟勝速奉朝歡抃躍之情倍萬恒品不勝集作

任慶快之至謹追儺人天官常選李佑別奏左衛長上校

尉張德俊奉露布以聞其軍資器械別簿條上謹言

為幽州長史薛楚玉破契丹露布

玄宗

樊衡

臣聞天地設險聖人則之土生懸弧其來尚矣故黃帝涿
鹿之戰重華三苗之役湯伐有扈文王克崇至於不得已
而用之其實一也伏惟開元神武皇帝陛下乘五聖之資
踞六合之大一作盛德光天下一作光威振百蠻四方無金
革之事蓋亦久矣蠢茲凶寇東胡餘孽日者關門未通障
在荒外自相殺戮君臣無序不能獨立交臂屈膝求我國
家以安之聖朝矜其輸誠且以護塞故列于朝貢編於鴻

臚故再冊名王累降重主魁渠豪首靡不霑渥自開復營
州二十年内部落不聳安農牙商金帛山積我國家之於
惠貸亦深矣而野姓易動狼心不革中復背誕寇我柳城
我是以有平盧之戰當爲兵少城孤不暇追地盡其巢穴
殘凶游魂假氣絕徼自以爲黃河溼可以保天險懸塞沙
漠可以逃靈誅陸梁窮荒迷肆不復我王師遠略是以有
黑山之討其突厥分兵助爲聲勢官軍旣會萬弩齊發逆
順不敵賢王失陣契丹東龍鍾走林奔穴甌脫不守髦頭
匿光可突干挾馬浮河僅獲殘喘謂其困而知悟面縛請
降而西連匈奴東構渤海收合餘燼窺我阿降其我是以
有盧龍之師當是時也四蕃雲屯十萬雨集動兵鼓噪聲

聞百里山川晝昏土木皆震勢欲朝驅降戶夕通河朔我
行軍七千乘天假威靈黜之硤石斬單于之愛子燔契丹
之積卒衆虜奔逃扶傷不暇於是從散約解雲卷霧消投
戈棄甲莫敢迴視我降戶完然堅利而西蕃輜畜十遺半
矣突厥乘喬驕兩蕃籍甚銳悍所向得志其來久矣昔漢
高祖以三十萬衆猛將如雲謀臣若雨平城之下七日不
食竟以計免頃萬歲通天中亦忿其不恭雷霆發怒驅熊
羆之卒策羆武之將以數十萬相繼而出沒之峽中隻輪
不返卒使趙定陷沒河北塗炭數十年間瘡痍不復所以
敢輕犯官軍之衆者以往事之驕我國家偏師不滿七千
當十萬之寇綿險提寡揚桴而出勢同解竹兵不留行於

戲前事也如彼今捷也如此哉蓋順人心因神怒察地利
用天時威靈之所覆而逆順不敵也然自黃龍舉烽無歲
不戰驚駭我城柵屢劉我亭戍勞軼我師徒糜耗我廣輸
實已四稔于茲矣若乘勝不殄無以一戎所以戰士憤惋
餘怒未洩將斬踏史作頓以染鍔血頭曼以豐鼓彷徨北
兵一作望煙塵而不肯返旆者久之臣以爲突厥銳而逃
渤海懾懼勢未敢出契丹大戰之後人馬俱羸其心不振
又恃以荒遠必無我虞而諸軍蓄銳久思奮發新聞破賊
無不增氣若驅而襲之可不血刃而取也臣又與侍御史
王審禮節度副使烏知義及將士等僉議咸以爲然議猶
未決適會勅令臣討遂臣已準勅書當日宣布三軍之士

莫不踴躍於是拔距蒙輪之伍響應投蓋超乘之卒景

節度副使右羽林軍大將軍烏知義即令都護裴旻理兵

述職大閱于松林管內勇士萬人一作駟千里拔三丈

者得七十一作千疋輕幟迅走之乘鷹揚貔武之士左羸糧

右持械者日越七百里朝發薊門夕宿碣石者得八千人

勵以威神節以金鼓旣而饒樂歸義王李詩衙官可支刺

吏伊覓暕一無燭祿并里水扶餘者遠未盧東胡雜種君

長之郡左射人右射馬翼迅霆轉沙振駢角者二萬伍千

餘騎鐵甲霜野朱旗火天遂陵赤山下塞谷絕決漭橫大

漠以四月二十三日夜銜放渡黃河質明頓夫松漠漠庭

疾雷暴驚天落地動郡堯狂顧周章自失於三軍橫巨風

文苑英華 卷一百一十五
偃電掃烏知義都統主

一作王

中權裴旻領三千騎與宣慰

計會發兵馬使內給事薊思賢副使內寺伯李安達右領軍衛翊府即將李良玉軍前討擊副使大將軍鑰高等爲先鋒中郎內供奉李先壽領馬步五千與宣慰內供奉奚官局令王尚客內供奉中郎李延光長上折衝史直臣右饒衛左郎將王抱一經略軍副使左衛率府右郎將李求定咸寧府軍李車蒙領馬步五千與宣慰使內謁者監劉玄向供奉長上折衝康太和一作刊供奉長上折衝白延宗長上果毅高處謀永寧府果毅閻昇臣副將布折等爲右翼中郎將裴債疑領馬步五千與攝副使內供奉左驍衛府郎將抱忠英樂府折衝李璿等爲後殿奚王李詩與內

供奉長上折衝歸州刺史韓仙松衙官段志忠等統其部屬知虜掠北郡長上折衝兼儒州都督烏承恩與供奉將軍恩盧廷賓平盧軍攝副使遂城縣折衝桓善珍經略軍副使政和府果毅楊元亨軍前討擊副使果毅路順清夷軍子將英樂府右果毅樊懷璧等四面雲合煙塵俱起兩翼掩進前後夾攻數百里間沸聲若雷波駭雲亂窮寇奪氣僵仆相籍弓不暇張戈不敢振雖蒙茸奔穴町疇走險輾轢所暨盡爲鯨鯢其餘孱幼匿車惕喘穹帳烈火既焚與煙俱銷者不可勝數或遣奔迸晚扼據峻嶺聚徒嘯侶擬欲鳴吠而左縈右拂咸在彀中傷鳥惡弦舉弓皆落於是縮兵施甲俯伏請命俘虜蔽於原野羊牛填於坑谷遺

械如草流膏成川然後戮渠魁斬封豕責元帥罪祐衆啓
降二十五日收獲南驅二十七日次于烏鵲都山前後大
小三十一陣旗鼓所向莫不奔潰野絕遺寇萬里肅清然
後頓軍休士大閱俘實約生級羊馬駝驢器械都獲三十
餘萬口足頭數其餘瀑潦奔注浮澗涉河揭厲未畢而中
流汨沒不入見數者十餘二三所斬丁將豪健暴骸相籍
者亦三萬餘級所焚藝車帳農具器械儲糧老小灰燼燼
滅者不知涯極於是推牛買酒散賞高會宣慰使內謁者
監普心寂與判官掖庭局監潘進忠別勅行人李如意等
衛命至便申慰諭三軍蹈舞呼聲動天將吏等令驅蠻夷
而襲虜庭因寇糧以贍軍用亦降奚所勤懇也伏惟勅俘

廣許戰士奚等內附賞餌因而用之且不踰時禮也率十
六萬口牛四萬頭馬四萬疋車五十乘并生級除留堪進
九千人已上餘四萬衆悉降奚旣以蠻夷出攻亦以蠻夷
入賞俘獲數廣行程不多自振旅而旋日役數十以今月
四日兵馬並平安到平盧蕃漢犍兒惟六人損一人死臣
聞善戰不陣良將難之臣等不才承命出師遠征勁虜二
十三部落並不鈍鋒士馬完歸軍容益振非陛下威神所
覆則臣等碎首必然今幸覩洪勳不勝慶快之至謹遣戰
將攝副使行軍虞侯惣管檀州密雲府果毅都慰賜紫金
魚袋車仙憚奉露布以聞其所獲首級器械別錄申上

文苑英華卷第六百四十七

文苑英華卷第六百四十八

露布二

河西破蕃賊露布一首

兵部奏劔南節度破西山賊露布一首

兵部奏桂州破西原賊露布一首

西平王李晟收西京露布一首

河西破蕃賊露布

朝議大夫守左散騎侍郎河西節度經畧使營田九姓長
行轉運等副使判武威郡事赤水軍使攝御史中丞賜紫
金魚袋上柱國臣某破蕃賊露布事尚書兵部臣聞背施
怒隣惡貫以滿者天誅之行慶布澤德政以順者人從之

况乎夷背其隣有貫盈之罪王將服叛舉德政之役彼曲
我直何可敵哉蠢茲吐蕃僻在西裔山川禽獸以處之造
物者以限之於外區也我國家貞觀之際戎有微服來朝
太宗因而異之啗以金帛終其身不敢近漢邊矣中宗之
享國許脩舊好姑務息人乃割愛主以降之至今朝廷無
西顧之患洎我開元天寶聖文神武皇帝陛下嗣宅丕業
文化遐被非不以德和之矣然彼戎以承數代之患晏安
七十年之間而得掠諸夷之種落猶織草之滋蔓因怙其
衆轉以作讐悉國興師犯我河隴天罰有罪大敗其衆既
而戎有疑旋悔願得比爲舅甥我皇帝以天地爲心山澤
會垢重使信以綏撫蓋不忍以蠻夷而疲其中國人也曠

外而翼之犬長吠主反伐勃律之屬國匿我四疑亂之亡
人誘我石堡之城踐我蕃禾之麥多行背德是惡貫矣我
皇帝怒之密發中詔使乘不虞以襲之臣以統五原之帥
擁中軍之師奉聖畧憑天威以今月初戒太初之巖引高
牙而出十二月會于大斗之南擇精騎五千皆蓬頭突鬢
劍服之士乃遣都知兵馬使左羽林軍大將軍安波主帥
之先鋒使右羽林大將軍李守義副之十將中馬軍副使
折衝李廣琛等部之臣自以馬步三千餘大斗建康三水
張掖等五大賊路爲應接別委行軍司馬大理司直攝殿
中侍御史盧幼臨領步兵五百過合黎川爲聲援又使大
將軍渾大寧將軍契苾嘉賓各領步兵於三水賊境爲椅

角波主等將辭臣戒之曰爾豈不聞乎天子之怒伏尸者
百萬將軍之權得專誅戮爾須自大斗南山來入取建康
西路而歸當吾所戰鋒可斷飛鳥若不尅于敵逗畱却一作
既行汝則有大刑雖尅于敵故道而還汝亦有大刑緣隴
以西賊必知懼縱爲多備亦可鼓行此本出於聖謀縱舉
覺必亦無慮諸將乃敢於勇決進不顧身十二日至新城
南吐蕃已燒盡野草列大如晝諸將曰賊果知備矣因躡
其烽燧高揭旌旗氣雄雷霆聲疾風雨十五日至清海北
界遇吐蕃兩軍遊奕二千餘騎波主乃使先鋒使大將軍
李守義領鐵騎一千穿賊之中取皆而陣又使先鋒副使
郎將安貞領騎二百摩賊之壘斬馘而旋又使中馬軍副

使李廣琛領勃律馬騎一千攻其旁又使節度總管李朱

師等領兵八百騎亢其下使右馬軍副使張仁賢以遊兵

一作一千敵其南北東西左右橫集而兵氣初銳馬逸不

止弓矢三注而連發長劔四按而無前初滌廢與一作苟

在終蹂踐而皆盡誰爲其後徒言魂魄歸天不報國恩翻

聞肝腦塗地則向之爲寇今已殲焉自朝至于日中凡斬

二千餘級十六日進至魚海軍千里烟塵百道旗鼓

波主已先遣前軍副使折衝傅光越設伏於便道及交矢

石又使節度總管唐朝英等寇疑而僞奔戎爭追之遇伏

皆死一作斃因得戮巨鯨於魚海墜封豕於鹿泉平積骸成

京觀斬魚海軍大使劔具一人生禽魚海軍副使金字告

身論悉諾匝生擒棄軍大使節度悉諾殺生擒遊奕副使
諾匝生擒副使金字告身拱齋生擒魚海軍副使銀字告
身統牙胡其餘褊裨難以盡一作備載斬首三千級生俘千
餘人牛馬羊駝八萬餘頭數獲未畢虜救潛來在山蒲山
在谷蒲谷顧盼之際合圍數重諸將皆曰兵法所謂致之
死地今則是也亦焉能陷於虜廷辱明主之深料乎於是
謀夫一心戰倍力擇強弩長戰爲外拒真輜重生級於其
內雖喜獲多急何能保其俘囚有因動而將變且驅而斬
之其虜畜有力極而難致則擁而焚之候暴夜之時望歸
路而突之其初也銜枚屏氣鬼神無聲既出則奮臂大呼
天地搖動暗疑作將馳逐而玄黃且戰且行一千餘里馬

無斷草之所人無杯一作集飲之地共食兵雪傳食糗糧猶

能夜盜虜之勞使自攻殺朝拔虜之幟爭爲致師凡七八

日間約三百餘陣至合河之北斬得二丈之綏而莽布之

更益其銳兵追截我歸路安波主懼其危逼請救其後軍

臣遂遣副使劉之一作友儒等領後軍二千騎迎之會中使

駱玄表至臣行軍使善子雄監之同往救兵既至旌旗相

望其氣益振又戰數合虜旣不利夜遂遁逃臣聞軍得歸

便牒安波主虜之去也必謂我不能復追之必出其不意

可使安思順反戈却入必盡擒之遂東疑作東精騎二千與

之又使副使娑羅度抱一二丈城副使李可朱副之臣別
差大斗軍副使烏懷愿討擊副使哥舒翰等領精騎一千

應之分前麾隨間道蔽山乘夜晨壓賊營或馬淖其妖夢
之時或乃遊于假寐之際死生同泯不知其云前有朱衣
旃喪保而相拒首已飛於異處身猶僵而兀立不可勝紀
其有漏網得逸擐甲復來耻於生降窮以死決不免戈矛
以撞秘而擁坑谷以頽填而就拉拘十不存一所以擒金
銀告身副使三人斬首千餘俘囚二百餘人獲牛馬羊駝
共三千餘頭足器械新物一萬餘事謂我再尅而虜再敗
矣皆會漢境一如往昔之朝善一作善非戰以來人所不覩臣
誠迹前事行之惟艱且李陵之兵盡矢窮縶爲之虜秦人
之勞師襲遠再敗其師未有如今之深入能勝歸者此乃
陛下神斷之謀也聖威之被也不然豈季冬之月天地嚴

凝齋孤軍十月

疑作日

之糧入絕域重阻之地橫跳千里連

鼓數軍討而復擒歸而復襲一日三捷震天聲而凱旋臣
獨輯甲兵日討軍實終當拔邏些城青地斬贊普之首以
懸北闕則臣之願畢矣不勝慶快之至謹遣某官奉露布
以聞

兵部奏劔南節度破西山賊露布

玄宗

楊譚

臣聞犬分四序寒暑莫同地裂八陣華夷各異言語不達
詎可以政令齊苞茅不供乃可以干戈服黃軒有涿鹿之
戰以定火災顓頊有共工之陣以平水害遯聽前古無能
去兵將用撫柔遐荒混一書執豈徒勞師玩寇贖武殘人
而已哉伏惟開元天地之大寶聖文神武應道皇帝陛下

清靜端極無爲體道祖文德而耀昌期種虜解甲恢武功
而運上策皆慕化之賓惟彼西戎可逃天孽豈謂慈仁廣
覆猶見背陽之禽聲教傍羅尚有吠堯之犬伏以南蠻亂
德恃險偷生吐蕃舉國興兵資其叛逆頃者西山戰士及
八國子弟因其窘逼遂欲憑陵敢懷猶鬪之心來犯必誅
之令以正月五日率故洪臘城裏囊邛三節度兵馬八萬
餘人分爲六道攻圍萬安柔遠明威干戎及保寧都護衛
等五城驅牛馬有甚於谷量運干戈實踰於山積萬安城
使金吾衛將軍張知海柔遠城使右金吾衛大將軍于仙
障平戎城使武衛劉元果明威副使折衝管希光攝保寧
都護折衝馬仙童等又戍邊隅備閑攻守或自固堅壁不

發懸門或蓄其精銳誘以羸弱賊等不虞設詐競欲登陴
耳鼓當彼竭之餘一舉得我盈之勢矢石齊發噍類無遺
前後殺傷不可勝紀八國招討副使左羽林軍大將軍董
當左羽林軍將軍董董旁郎董畢郎右羽林軍董利董哥弄左
驍衛將軍董利峯一作蓬左武衛將軍董奉仇左威衛翊府
中郎將先鋒党利才統八國子弟八千餘衆并都護武士
府健兒一千餘衆間道設伏潛入深林旗鼓相望晝夜苦
戰自其月十五日都護武士殺賊衆退散至十七日遂攻
合所圍明威柔遠兩城兵馬併力死戰攻萬安新城十八
日都知西山子弟兵馬副使左金吾衛大將軍攝臨翼郡
太守董卻麴左羽林軍大將軍兼靜郡太守董元智右羽

林大將軍兼蓬山郡太守董懷恩右驍衛將軍兼歸誠郡
太守董思賢江源郡太守董懿一作右驍衛大將軍董仁
熊折衝董弄封等領八郡驍勇并蕃漢武士等七千人自
蓬姿路取牙山出其不意斮夜襲賊等震驚遂相殘戮
葉其輜重稍欲抽軍蒼黃之際前後一作畧盡漂杵之血
方此非少積觀之屍今茲目覩同州節度副使都知兵馬
使左羽林大將軍兼通化郡太守譚元管受遣左金吾衛
將軍裴振攝維川郡長史折衝張紫雲山守捉使折衝姚
高侃攝天保郡折衝楊夏日攝司馬董元勒一作等率健
彊三千人自滴博領入競施犄角之勢各陳擒縱之謀自
正月五日至二月五日前後轉戰五千餘陣生擒吐蕃哥

末國王梁兵馬副使崔步離并士衆等二千餘人斬獲
故節度副使且祿翁都知使乞呂徐男律熙等械牛馬羊
等二十餘萬右威衛郎將康裕昌保寧都護府長史鍾景
等恭承將命挺劔重圍宣傳聖恩曉諭將士遂得賈勇萬
夫激節以小克衆實仗天威取亂推亡誠因廟筭今長鯨
就戮封豕載屠桃塞放牛徒聞往謀華陽歸馬稀遇聖朝
無任慶快之至謹遣威衛郎將楊如海奉露布以聞軍資
器械別簿錄上

兵部奏桂州破西原賊露布

肅宗

前人

臣聞聲教無外脩文德以來遠人職貢有虧耀武威而討
亡命然則五材並用金革爲過亂之資八卦相宣弧矢乃

濟時之具事非獲已道豈爲侷將治衆以安人必除殘而
禁暴歷覽今古誰能去兵未有捨禮樂而致升平奮干戈
而弘大業者也伏惟乾元大聖光天文武孝感皇帝陛下
明齊日月德配天地化同異類澤洎無垠寰宇已墜而更
興社稷將顛而復振崇勲累績曠古莫儔蠢茲魑魅之鄉
敢恃犬羊之衆據其險要恣其寇攘西原羈縻舊染聲教
被其不問二字一作險皆可疑誘引同惡者多僭稱王侯僞署官爵
旌旗蔽野鼓角沸天恣殺戮以威人將玉帛而濟衆方圓
數千里控帶十八州丁壯並執其干戈子女盡充其僕隸
自謂強盛轉加兇頑迫之則烏散獸驚緩之則蟻結蜂聚
老幼奔走耕稼失時萬井無烟兆人失業不賓王化于茲

四總臣前年銜臣到州深入招慰示之仁信許其自新猶

尚憑陵每行攻劫管內州縣日漸流離村落焚燒廬井空

竭伏奉去年三月十日勅遣中使魏一作衛朝璨宣慰凡諸

首領皆賜勅書再三曉諭許其官爵但以炎方人物躁兢

者多承平已來久絕朝命自蒙提獎感激殊私戮力同心

傾家竭產訓勉子弟策勵甲兵介冑自出於私門糧儲不

損於官廩向非陛下化周動植德及遐荒豈有不勞王師

坐清氛稔去年二月二日睦州武陽珠唐書作朱蘭金溪黃橙

等一百餘洞大賊帥僞號中越王廖殿此下僞號唐書與英華顛錯不同

僞號桂南王莫淳僞號拓南王相公唐書作文僞號越南王莫

尋唐書作尋僞號象郡王梁泰唐書作奉僞號鎮南王羅成唐書作誠僞

號戎成王莫禱僞號南海王羅品等潛相結構約二十萬
衆誇壞連州志如梟獍風號雨嘯心等豺狼仍欲先破嶺
南後圖嶺北遠近百姓皆不聊生臣遂激勸將士宣傳聖
旨誘以厚賞使其盡節皆決命苦戰非無損傷不顧危亡
志懷忠勇大首領梧州長史鎮南副都護攝柳州刺史西
原遊奕使張維南勸率首領統茲軍政萬夫齊進一舉無
遺都知兵馬使朝散大夫象州刺史成匝領當管及柳州
刺使衝州等戰手共一萬人卷其旌旗踰挺爭先膺有渠
魁當陣斬獲經畧副使朝議郎行賀州長史穆成構防禦
副使朝議郎梧州長史任早梧州刺史本州防禦使李抗
先鋒總管梧州長史秦匡朝四界遊奕使廣州番禺府折

衝譚崇慰及總管子將等五百餘人并西原環古等州首
領方子彈甘令揮羅承韋張九解宋原等五百餘人各領
子弟并部外義征及總管內戰手共成二十萬衆或擐甲
伏兵縱其救援或致果決勝扼其喉咽左右夾攻飛走無
路諸將及首領等義在竭誠以死無生以晝繼夜或攻或
圍當其彼竭之餘遂得我盈之勢封豕旣戮長蛇又屠餘
黨喧騰自相蹂踐勢如解籜事等摧枯指揮而夷僚喪氣
魂一作叱咤而山川阻色賊等旣因失律不知所向或連袂
墜谷自成積觀之尸或帶刃投江有同漂杵之血橫行歲
久驕縱日深勢如雷霆莫敢拒敵臣乃陳師誓衆思各忘
軀自春徂冬凡經二百餘日前後苦戰各三十餘陣破賊

二十萬眾斬首五十餘級以頭首喪亡餘黨奔亂窮滅之

後然始求降臣伏以人無盡劉道忌太甚因陛下好生之

德合陛下至仁之心於是宣傳聖恩示其生路大賊帥武

承裴敬簡唐書作武裴承等二人餘眾竄伏無地周章失圖

解一作甲轅門面縛請罪臣便脫其桎梏仍加宴賞兼賚

疋帛散於營農各分疆界使其斥堠遞相轄控永絕憂虞

今臣管內亦且寧帖實賴天威遠備疑作廟筭遐臨靜彼

兇殘康茲億兆無任慶躍之至謹遣所部官桂州臨桂縣

丞朱璟謹奉露布以聞其立功將士首領別簿奏上

西平王李晟收西京露布一作破朱泚露布于公異

神策軍京畿渭北商華鄜坊丹延等州兵馬副元帥李晟

於苑墻內神麇倉東南連白苑二唐書作華破逆賊朱泚兵馬

收復上都露布事尚書兵部臣聞春司生榮秋司一作殺

伐若終始煦嫗一作則不能成歲功仁則順成暴則殘滅

一作滅絕若一貫邪正則不能建大中是以一作春秋序行則

通天和而毋元氣一作通天和而充氣母德刑具舉則協王道而經

彛倫亂由是除兵不可去堯舜禹湯之德統元立極之君

或制五兵或張九伐盖欲儀剔克戾一作攘又安一作生

靈補雍熙之未洽佐聲教之不暨有以然者抑實為焉一作

向伏惟皇帝陛下溥博法於乾坤貞明侔於日月陶埏六

籍表正萬邦揚高祖太宗之耿光奉肅宗代宗之丕烈自

纂承一作前緒高居穆清率土承有截之風懷生無不遂

之性一作物頃者邊鄙或聳干戈爰設有征無戰許蔡倭首

領之誅陸梁背誕涇原生肘腋之變逆賊朱泚所以委身

凶德假翻姦徒熒惑我生人僭賊我神器聚為起穢之物

腥彼宮闈散作旬始之妖孛于躔次先皇帝懷柔河朔敷

佑下人錄其率化之類一作續加以登朝一作優之禮恩澤

汪濊集凡庶之風名噐燠灼加鬪茸之輩一作質謂一作革

桀跖一作鶩將馴大和殊不知惡木生槎枿之筭瘼一作狗

吠豸牢之主頃屬鑾輿順動郊畿一作圻駐蹕而泚乃嘯兇

命醜阻兵安忍長戟一作指闕流矢射天穿高鏞以鼠牙

毒王師以蠆尾罪浮一作諭弄浞惡貫梟獍是以萬方糾一作

憤怒九服豈騰思齒劔者投袂而興爭傳一作泚刃者不

而會屬賊臣聞一作伺釁陰貸凶謀中一作既緩雷霆之誅遂

延頃一作畧刻之命臣是用祗承睿筭恭行天罰一作詩攝衣

登壇明君親一作臣之大義馮牙宜一作饗社假神祇之幽贊

以今月二十五日更一無總領師徒直趨都邑畧灑澆而

一作揚旆瞰囿游一作苑而下營土濠一作扶雲舒木柵一作

林植養威蓄銳直殄元兇一作兇卧鼓偃旗猶輕小利賊

初陵犯畧以一作已芟夷謂其氣竭而來歸尚敢尸居而作

固敵若可縱師多奚為遂一無至二十七日會諸將於中

權占勝風於大旆未鼓而人心粗勵先庚而軍令凝嚴各

懷報主之誠一作主盡一作爭淬復讐之刃臣知其可用遂

此疾一作長驅五月二十八日寅時華州鎮國軍節度使駱

元允神策行營商州節度使兼御史大夫尚可孤本軍副

使都知兵馬使御史大夫吳說一作都虞候兼御史大夫

邢君牙京西行營都知兵馬使檢校工部尚書孟涉

右廂兵馬使御史大夫康英俊隴州節度右廂兵馬使郭

審全又權又成神策行營商州節度都虞候彭元一作俊

等受一作命於牙旗之下分麾於轅門之外將士等超乘

賈勇免冒啓行夾川陸而左旋右抽抵丘陵而侵一作滄

布護聲塞宇宙氣雄鉦鼓陳兵於光泰門外悉一作銳於

神麤倉東繚垣一作以成塵滋水涸而為地左廣未歸

離一作於舊壘前偏已交於賊鋒若降於天若一作出於也

賊師姚令言張芝一作雲二唐等志懷剽一作狡心一作

尚憑陵作忠盡謀力則不及怙亂賊義氣則一作有餘勢

如一作飈馳衆若蜂一作集橫列堅陣勢一作連高岡猶

張躡蹙之鱗更舉螳螂之臂衙前兵馬使兼御史大夫王

必知牙官兼刀斧將兼御史中丞史萬頃等自相誓約又

令軍行一作指麾而貔一作兕作威感激而風雲動色

遂先登進擊深入合攻七擒連發而星馳兩翼旁行一作

而雲合霜刃吐一作光而揮霍一作鼙鼓騰聲而隱驂賊

方土崩我乃霆擊乘其蹈一作籍遂至於上蘭取彼鯨鯢

直通乎一作中禁段誠諫賊之心脅既就生擒涇原將一作

沈原一作賊之羽毛終制死命顧其係頸求活投弋乞降崩騰

於秦莽一作之間震懾於旌麾之下臣以其今一作染汗

...

俗昔實平人推赤心以如初敷皇一作王化而咸一作如姚

令言等力扞王師退而復合惡烏將墜尚顧危巢妖狐就

擒猶守舊穴自矜及申一作自矜拒而復攻謹諫之聲山

傾而河泄鼓輦之氣霆鬪而電奔一作雷馳屏翳發向敵之風

回祿扇燎原之焰馬逸不止人怒未舒既自北而徂南竟

輿屍一作尸而折首又使決勝軍節度使工部尚書唐良臣

右廂兵馬使御史大夫趙光鑑一作銑唐書作銑義武軍兵馬使

楊萬榮左步軍使御史大夫孟曰華馬軍將由子奇霍去

愨一作傲郝觀等一無華州節度使左廂先軍兵馬使馬英

華右先鋒兵馬使董泚華州至董泚二十三字一作華州左廂兵馬使馬英右先鋒兵馬使

董泚神策行營商州節度兵馬使賈直金右廂左都虞候

武庫之五兵憑宮垣之萬雉及茲翦滅才一作纔欲乘陵

曾無一作之鑄刃之鋒已失藩籬之固遂生擒偽署侍中董

泰中書侍郎平將事蔣鎮左一作右僕射同平章事張光晃

一作晟字兵馬使李倩敬釭等逆賊朱泚與同惡姚令言張芝

等輕騎走出臣已遣兵馬使田子奇等追躡計即梟一作誅

夷臣竊以此賊包藏逆謀叅會凶德侵沴一作氣其氣豺武

其心背先皇亭育之恩傷陛下玄默之化漢之斧卓未足

等夷晉有敦玄自當超軼子暴其父陰侵於陽自古未有

如泚之大者也或者上天之意申傲於巨唐中興之期先

光一作啓於陛下然則二字一作不然何王師奮伐一作發勢無駐於

勢無駐於

建瓴醜類捨攘功有輕於折筮猶慙一作密網尚反隻輪

誠當盡敵之時更發追亡之騎且稽分體未即燃臍快憶

兆之歡心復一作宗社之深耻即當梟戮用申刑典今已

肅清宮禁祗一作謁寢園鍾簾不移廟貌如故盡為二字

蓋宸極之所垂祐一作列聖之所雄都神扶業業之傾天

降穰穰之福不然豈免於毀圯之患崩剝之虞者哉此皆

上天降鑒眷慮潛一作施制兵要於事先規雄武一作於

穀內再造可封之俗因橐不戰之功左武右文銷鋒鑄鐔

澹乎華胥之代一作冥一作然葛天之風臣謬寄台司幸

自統師乏吉甫之文武缺卻穀之詩書此皆諸衆叶心羣

師宣力非臣庸瑣敢自矜大臣不勝慶快之極謹差監軍

使王敬親牙觀御史大夫符郡王邵張少引謹奉露布以


聞

八百里

文苑英華卷第六百四十八

文苑英華卷第六百四十九

彈文



彈賈執傳湛文一首

彈張瑾將軍等文一首

彈李子和將軍文一首

為御史彈尚書某人入朝不敬文一首

代御史王師旦彈莒國公唐儉文一首

彈劍南東川節度使嚴礪文一首

彈賈執傳湛文

梁大同中

劉孝儀

長兼御史中丞劉孝儀稽首言南康嗣王府行參軍知譜
事賈執與前中書舍人傳湛在王座飲酒時上不安人從
臺還聖體已和湛乃揚眉頓目謂執曰卿念天子我不見

闕出悖慢言語連及於上共執忿誶湛昔經殺牛誤父自
殺近效殘貪賄賂狼藉特逢解網宥其餘命自被棄廢尤
懷怨憤謗訕不遜謹按前兼通事舍人臣傳湛才簿一作薄
駑蹇特荷抽擢自預左右頻蹈極刑押對鞠書累逢闕過
未聞報效及懷恚憤聖體不安臣下憂懼而湛敢生怨望
輕肆慢辭醜爭及父心無愛敬戲語連上罪同悖逆未央
馬瘦不覩廐今之忠甘泉道蕪遽見扶風之罪宜其徇乎
東市尸彼轂門南康嗣王府叅軍臣賈執始間湛語初無
逐雀之心末因私忿遂顯懷鴆之逆雖跡似折奸意由肆
憾惡慢於人自彰穢醜見辱父子已會季倫之辭爭及其
父復入梁蚡之難一作歎是使王嬙悲於連累黑要喜於得

用太子舍人始興蕃王臣蕭毅幸因祉祚爵預藩屏而散
金失所設醴乖人雍容之賓未遊於雕苑號怒之容日醉
於雷池致使博徒跣弛慢醉盈路醜顏受辱曾無發糾並
怒伯厚之心俱鳴路粹之責臣等叅議請以見事依法免
毅所居官解執知譜事請議貶黜付之卿論不得廝預官
流刺尚施行輒不禁止

彈張瑾將軍等文

杜正倫

臣聞陳力就列不能者止鍾鳴漏蓋夜行宜息故張良多
病辭少傳而專道養常賢告老謝丞相而乞骸骨豈惟體
非筋力不可疲殆從政抑亦情重謙退欲以廉讓弘道自
時積亂離久習澆弊仁義之化忽之其右遺名利所存苟

得而無恥今四海乂安群生樂業陛下思治之情勞於寤寐臣謂欲防其末先正其本若廉恥之教不行則升平之化無自謹按瑾等理治之教義多罕稱出身事主行能兼闕年方壯也尚不如人耄又及之無能爲矣張瑾拔跡行陣素無才畧自歸聖朝搃兵一作屢總過任子玉之戰頗有喪師須賈之髮未足論罪朝廷假以餘年不寘於法陛下再造天地更施雲雨瑾等並以髮齒流恩遂使名器踰量特進之號擬迹竇周公冠軍之名連衡霍去病旣年在遲暮智乏老成宜思靜退自安止足而外託闕庭之戀內希筐篚之恩牽力衰朽強顏預朝一作強顏陛下仁愛之心形容於萬物以其不堪侍立特於廊下賜坐叨榮自若聞不

驚貪競之志更深覲目

一作胃

之顏愈厚臣聞設法訓人在

弘其教引年敬老終取於賢寧有庸庸之流諄諄若是而可均彼上庠忝茲厚秩且名曰人臣事乖朝列養非貴德坐異論道縱慶雲之會不別荆棘闕恩傷教其如禮何臣以庸才謬當朝寄風俗未清實任其咎瑾等爵秩旣隆虧損尤大釋此不問安事狐貍激貪止競宜從隗始儻天地含容未至一作忍屏黜請斥放之罷歸里第且七十致仕古今通規近代以來貪競不息臣隨即舉劾恐陷罪者多內外諸司有如此比散下知之使遵節制四維以張彝倫式叙

彈李子和將軍文

前人

臣某言臣聞同陰以息分路尚有悽然向隅成悲蒲堂猶
且不樂况天倫長逝伉儷不終共被同車之歡遂隔今古
撫存悼亡之痛有傷心目而可譬孔懷於行路忽齊體於
泉壤對凶筵而奏艷妓悅新寵而忘舊哀此實名教所不
容人倫之尤露者也謹按子和一介庸流百行兼闕階緣
際會叨濫恩榮乃分建茅叅掌禁衛厠跡周行有年歲矣
縱前賢之行未識思齊而先王之禮宜其企及寧有第喪
妻殞纔逾十旬子哭父歌遂同一日身被子高之練室對
安人之簞隣春不相而家妓畢陳節物共時而悲忻相對
傷風損教莫之爲甚何可視息人間叅預朝列雖自卹已
下無足致譏而告朔餼羊實愛其禮陛下勤求治理崇獎

行義欲使習弊之人變於其道但子和器識庸下所傷尤
大若準常科則免而無恥請特加貶以敦禮教謹奏

爲奚御史彈尚書某人入朝不敬文 陳子良

臣聞孝愛資於事父忠敬盡於事君淑慎爾儀不愆于位
聿脩厥德無忝所生苟虧格言必貽明罰竊見某甲出自
庸微素無才術幸以運逢義始早預周行佐命之勞已酬
爵土攀附之寵復典樞機擢自芻蕘功歸聖德昔晉榮八
座蔡謨始漸斯官漢貴五曹鄭均才沾此秩况某方圓無
取叨據非宜而覆餗之譏於焉已及歌器之戒如何遂盈
不能翼翼在公競競從政及復入朝散誕無鞠躬之容陪
軒慢懈之虔恭之禮有一於此身名何寘臣雖凡品職當

糾察既覩相鼠之儀敢忘逐雀之志若斯風不黜方紊大猷宜正刑書以彰朝典請以某見事付大理治罪謹言

代御史王師旦彈營國公唐儉文

許敬宗

臣聞古人蒞職不膳池魚前良罷官尚留家犢拔園葵而自潔垂徃哲之通規飲吳水而齊清標曩代之遺則若乃營求不已貪猥無厭徇私利而黷官方挾朝權而侮天憲有一於此必寘明科風聞唐儉徃任尚書之日付託前鹽州刺史張巨令舊唐書作巨令遣錄事參軍張正表元大節等專令檢校牧放私羊所判文書自云檢示約束剪毛之貨易州僚判署潛立公文市司勘估一同官案并有放羊人康莫賀咄所署文牒共稱牧長依問巡察使楊暮狀與新聲

積一作新聲扶

同謹按前

部尚書光祿大夫莒國公唐儉

資斗食器劣餅筭在勢爲優唯聞酒德座

一作席

賓常蒲無

匪博徒以逐兔之微庸屬鳳翔之興運功未參於執帛賞

已茂於桓圭效無補於經綸位乃隆於常伯由是越自泥

滓超驤雲漢甲第高門與絳灌而並列朱輪翠蓋共吳鄧

以齊驅寵出勲前化家開國任君才表揮翼在梁歷膽隳

肝未答謬官之刺驛魂飛魄豈謝匪服之榮反復乘此恩

波肆其溪壑之性憑茲惠渥縱其姦慝之心敢以私產託

于州將芻豢交易並立案於曹司牧圉家童咸假署於名

級情包僭擬家有擅除以此論憊深驚視聽稽諸徃冊國

有常科其鹽州刺史張巨令昔在部符寵膺繁露超其勢

位擅役官寮資給貪夫成其敗類順行私令汨亂天綱請
皆付法以清攸斃無任嫉惡之至謹奉白簡以聞

彈劾南東川節度觀察處置等使嚴礪文 元禎

故劍南東川節度觀察處置等使嚴礪在任日擅籍沒管

內將士官吏百姓及前資寄住等庄宅奴婢等并集作今

兩稅外加徵集作配錢米及草等謹件如後

嚴礪擅籍沒管內將士官吏百姓及前資寄住塗山甫等

八十八戶庄宅共一百二十二所奴婢共二十七人並在

諸州頓內分析

右臣伏準前後制勅令出使御史所在訪察不法具狀表

聞臣昨三月一日勅令往劍南東川詳覆瀘川鑒官任

仲贓犯於彼訪聞嚴礪在任之日擅籍沒前件庄宅奴婢

等至今月十七日詳覆事畢追得所沒庄宅奴婢文案及

執行案典耿璿馬元亮等檢勘得實據嚴礪元和二年正

月十八日舉牒云集作稱管內諸州應經逆賊劉闢重圍內

并賊兵到處所有應接及救事西川軍將州縣官所由典

正前資寄住等所犯雖該集作經霈澤庄田須有所歸其有

庄田奴婢桑柘錢物斛斗邸杏碾磴等悉皆搜檢勘得塗

山甫等八十八戶案內並不經驗問虛實亦不具事賊職

名便收家產沒官其時都不聞奏所有集作取資財奴婢悉

皆貨賣破用及配充作坊驅使其庄宅桑田元和二年三

年租課嚴礪並已徵收支用訖臣伏準元和元年十月五

日制西川諸州諸鎮刺史大將及叅佐官吏將徤百姓等
應被脅從補署職官集作一切不問又準元和二年正月

三日赦文自今日已前大集作逆緣坐並與洗滌况前件

人等悉是東川將吏百姓及寄住衣冠與賊黨素無官屬

賊軍奄至暫彼脅從狂寇既平丹蒙恩蕩嚴礪違詔命苟

利資財擅破八十餘家曾無一字聞奏豈惟剝下實謂欺

天其庄宅等至今見被使司收管臣訪聞本主並在側近

控告無路漸至流亡伏乞聖慈勒本道長吏及諸州刺史

招葺集作疲人一切却還產業庶使孤窮有託編戶再安

其本判官及所管刺史仍乞加貶責以懲集作奸欺

嚴礪又於管內諸州元和二年兩稅錢外加配百姓草共

四十一萬四千八百六十七束每束重一十一斤

右臣伏準前後制勅令及每歲旨條兩稅留州使錢外加

率一錢一物州縣長吏並同枉法計賊仍令出使御史訪

察聞奏又準元和二年赦文大辟罪已下咸蒙恩蕩准官

典犯賊不在此例臣又集作聞嚴礪加配前件草準前月

日追得文案及執行案典姚孚檢勘得實據嚴礪元和二

年七月二十一日舉牒稱管內郵驛要草於諸州秋稅錢

上每貫加配一束至三年秋稅又準前加配計當上件草

臣伏準每年旨條館驛並集作有正科不合於兩稅錢外

擅有加徵况嚴礪元和三年舉牒已云準二年舊例徵收

必恐自此相承求使集作疲人重困伏乞勒本道長吏嚴

加禁斷本判官及刺史等仍集作伏乞準前科責以息誅求
嚴礪又於梓遂兩州元和二年兩稅外加徵錢共七千貫
文米共五千石

右臣伏準前月日追得文案及執行案典趙明志勘驗集

檢得實據嚴礪元和二年六月舉牒稱綿劍兩州供元和

元年北軍頓遞費用倍多量於梓遂兩州秋稅外加配上
件前米添填綿劍兩州頓遞費用者臣又牒勘綿州得勘

報稱元和二年軍資錢米悉準舊額收蒸送使訖並不曾

交領得梓遂兩集作等州錢米添填頓遞亦無可集作克折當

州錢米處者臣又牒勘劍州得報稱元和元年所供頓遞

侵用百姓腹內二集作兩年夏稅錢四千二十三貫三文使

司今於其年軍資錢內尅下訖其米即用元和元年米充

並不侵用二年軍資錢米數使司亦不曾交集作支梓州遂

州米充填者臣伏念綿劍兩州供頓自合準制集作勅優矜

梓遂百姓何辜擅令倍出租賦况所徵錢米數內準尅下

劍州軍資錢米四千二十三貫三文其餘錢及米並是嚴

礪加徵別有支用其本判官及梓州遂州刺史悉合科處

以例將來擅收沒塗山甫等產宅奴婢及於兩稅外加配

錢米草等本判官及諸州刺史名銜并所收色目謹具如

後

擅收奴婢庄宅等元舉牒判官度支副使檢校尚書

刑部員外郎兼侍御史賜緋魚袋崔延

都計諸州擅沒庄共六十三所宅四十八所奴一
十人婢一十七人

於管内諸州元和二年秋稅錢外隨貫加配草元
舉牒判官觀察判官殿中侍御史內供奉盧詡

都計諸州共加配草四十一萬四千八百六十七
束加徵梓遂兩州元和二年秋稅外錢及米元舉

牒判官攝節度判官監察御史裏行裴泫計兩州
徵錢共七千貫文米共五千石

梓州刺史檢校尚書左僕射兼御史大夫嚴礪元和

四年三月八日身亡擅收塗山等庄二十九所宅
四十一所奴九人婢一十七人加徵錢三千貫文

米二千石草七萬五千九百五十二束元和二年
三萬一千

七百九十二束元和三年
四萬四千一百六十束

遂州刺史柳蒙英華
作蒙

擅收沒李簡等庄八所宅四所奴一人加徵錢四

千貫文米三千石草四萬九千五百三十五束元

二年二萬四千五百三束元和
三年二萬五千四百八十二束

綿州刺史陶錫

擅收沒文懷進等庄二十所宅三十所加徵草八

萬八千六百八十八束元和二年三萬八千九十
三束元和三年五萬五百

九十
五束

劍州刺史崔實成

元和二年十一月五
日改授印州刺史

擅收沒鄧琮等庄六所加徵草二萬一千八百七十七束

元和二年九千三十九束
元和三年一萬二千七百七十八束

普州刺史李愆

元和二年加徵草六千束三年加徵草九千四百五十束

合州刺史張平

元和二年加配草三千四百六十二束三年加徵草五千六百五束

渝州刺史邵膺

元和二年加徵草二千六百一十四束三年加徵草三千七百二十束

榮州刺史陳雷

元和二年加徵草九千四百二束三年加徵草五千四百二十七束

瀘州刺史兼御史劉文翼

元和二年加徵草三千八百五十三束三年加徵草三千八百五十束

資州元和二年加徵草一萬五千七百九十八束三年加徵草一萬六千二百二十五束

簡州元和二年加徵草二萬四千一百四束三年二萬三千一百一十八束

陵州元和二年加徵草二萬四千六百六束三年二

萬三千八百六十一束

龍州元和二年加徵草八百九十一束三年二萬三

千八百六十一束

右以上本判官及刺史等名銜并所徵收名目謹具如前
其資簡等四州刺史或緣割屬西川或緣停替遷授伏乞
委本道長史各據徵收年月具勘名銜聞奏

以前件狀如前伏以聖慈軫念切在蒼生臨御五年三布

赦令殷勤曉諭優在集作惠困窮似涉擾人頻加禁斷况嚴

礪本是梓州百姓素無藝集作才行可稱久在兵間過蒙集作

於獎拔陛下錄其末集作微効移鎮東川仗節還鄉寵光無

比固合撫綏士集作黎庶上副天心蠲減征徭內榮鄉里而

乃橫徵暴賦不奉典常擅破人家自豐私室訪聞管內產

業阡陌相連僮僕資財動以萬計雖則一作即沒身謝恩而

猶遺患在人謂宜謚以配名削其褒贈用懲不法以警將

來其本判官及諸州刺史等或苟務容軀競謀侵削或分

憂列郡莫顧詔條但授節將指揮不懼朝廷典憲共為蒙

蔽皆合痛繩臣職在觸邪不勝其憤謹錄奏聞伏聽集作候

勅旨

文苑英華卷第六百四十九

文苑英華卷第六百五十一

移文

此卷英華所編失年代先後今正之

移虜淮陽太守文

為侯景叛移梁朝文

為東魏與梁請和移文

梁報東魏移文

答魏初和移文

移齊河陽執事文二首

移虜留使文

移虜淮陽太守文

永明十年太歲某淮陰太守某移淮陽長大齊乘乾得一



清寧今皇上體聖居震績戎昌緒仁澤之所灑沾惠風之
所偃靡威武之所勝疑作驤刑政之所宣暢浩匕乎其不

可涯涘固能徼岷禺關夷海拓沙渚道零山八徂承嗣九
垓禔福含齒戴髮其樂只且所以通歡魏境靜息邊民嗟

爾黔氓共和優忝而魏主不篤我信誓侮弱我慈懷憑陵
我南城寇擾我樊鄧元帥逞梟鳶之心銳卒畜蜂蠆之毒

蠅飛藩棘蟻附池隍我聊命偏將執而俘之連左袵於郊
門頻編首於外闕有司將加誅焉天子弗之許也重謁而

請天子又不許也更從請所以置之乃制詔曰昔虞帝欽
明苗山記倒戈之陣夏君踵武鈞臺載不戰之兵今鋒鏑

陵邊彤雲入候加討而後擒待征而知服此廼朕之涼德

彼將何德徒哀其積習為性因染遂變一作不職天時用

干人事雖同濱率境自隔王臣直曰斯民獨為係虜父母
生乖妻兒則疑作桑梓悠悠墳塋萬里情甚悲之可解網

改視聽歸巢穴豈直隣好足鄙疑特以哀矜自中以時資
遣稱朕意焉已遵明詔部送所虜若干人即日在界宜速

近護時施故堡使幽荒之外知皇王之德音故移
為侯景叛移梁朝文

魏收
夫化成萬物分界九道紀之以山河照之以日月方足圓
首含氣呈形成惣之於聖人畢會之以朝市皇魏應銜甲

之祕圖納封金之寶命萬方為宅四海為家卜世靈長將
踰八百年壤之間朝疑不別焉唯夫三江五湖九蠻百濮

其地如掌人鳥未分瞻星昧環拱之方託水迷朝宗之義
積蠅爲衆長蛇稱長石田無菽粟之用衆人非聲教所孚
是以年歷三僞棄而不有豈力不足蓋所未徵而陸梁塗
泥時軼疆鄙天討所遺理存惡殺自二紀及茲中原多故
未清區宇文武兼勤偃伯歸戰有懷勞止將令動植俱仰
堯心遂冠蓋括途象胥提告推誠蹶然類識王道授衣禮
一作節拜首歸仁舞戚所以爲高止戈故能稱大方知夙
沙交臂不待兵車有苗納款未勞征伐而庸夫爲善希能
令終狂人克念更知徒語聞利無匹夫之信好蜜有助鬼
之心白頭爲賊曾莫自揆嘉文浮功甘於苟得罔顧榆次
之禍詎識江浦之禽侯景一豎微蔑民斯下矣人倫士操

不倫直以少從羈勒頗習趨走叨忝名器事出爾朱
藏情諂笑唯利是視義兵同舉郡胡覆族雖孤祭首立事
非小人而忘恩背本景爲先至不義不信自此可知但丁
公之戮時有未可也大澤深山龍蛇並育遂容其悔非棄
其瑕穢任一作暇以將率授以兵符庶其被鞍銜鍊盡力馳
驟指蹤投繯驚兔或擒而弱才負重折足是慮置之不爭
之地虛出韓鄭之間曾無戰伐之勤可言摧陷之績歲往
年徂率無可紀而腹心群小信納逋亡劫奪行道侵掠民
庶流聲遠聞王法有典驄馬將出朱筆且行自貽伊戚了
不知咎盜憎主人乃圖逆節拔本塞源以疑委身賊虜逼
脅居民翻蕩城池義手曲躬千里唯諾賤賊相依忻同鱗

水寵以大位屬以東方外曰臣主內深骨肉安危契濶約
以死生拯其鼎鑊之命全其壘粉之福時不暇浹翻然易
慮還相掩擊事劇仇讐反覆剽獲莫非此類至於老母暮
倚少弟升岡妻望行夫子號出父食毛之屬可爲痛心哉
景忽之如草芥棄之如塵垢任其斲截之誅安其烹斬之
痛放麀食子有以可親觀臧窮否耻其並主獸心人面華
裔同讐歸家懼執法之刑赴賊反噬臍之釁首領無地進
退數窮遂卑邪說自託左右苟有君子義均逐雀而彼方
上下樂禍好亂叛竊之豎獲毒之人圖浮芥之小利忘丘
山之禍乃崇飾土偶被以玄黃馳馬高蓋載毳爲重委
以專征施其瓜角驅逼子姓率我叛亡逼厭虐之侶鞠養
後之衆蟻攢蚋集侵竊邊鄙恤患分災本不要於違僻違
衆悖禮蓋神明之所誅皇帝垂旒華土則天而動卷覆三
古懷佩百玉掌握中道崇基增構殊塗同會百慮一歸中
外禔福戎華俱庇持秋霜夏震之威以拔山超海之力顧
指則風雲惚至迴眸而山岳削平雖復旗鼓所臨有征無
戰猶以師出而服辱在我世所務者息民所存者文德豈
復以擒將威敵漂杵溺駮爲功於一時示武於千載且天
生五材有聞前古禍非我貽其得已乎遂置壇命將持柯
畢禮引營執道分途競馳批熊舉輪之士翹關扛鼎之卒
被組橫矛執受挺劔龍駒並躡驥子千群沸聒天壤蒸鬱
雲霄一朝指揮倏忽千里候騎羅絡聊逞前驅天兵之鼓

未鳴衆軍之旗詎接而荆揚烏合一朝崩解塞州滿野截
耳截鼻以千萬計不可勝數宗親節將咸見擒束委命軍
吏憂在釁鼓楚兵吳甲積若山丘青鵲赤烏噎流斷岸千
金之貴爲我資焉痛辱可哀其利安在覆師喪旅禍本可
尋方之噬臍悔之靡及皆侯景叛炭虛相陷誘指成提挈
之舉終無犄角之勢景棄本趨末背國違鄉部下數千屈
逼羅網離親懷土一日三炷拘網立匏朝不謀夕豈能搵
足東上遠赴彭城天奪彼鬼信納虛詭使蕭明貴孫面縛
於徐泗景爲凶藪逡巡而坐觀託人七尺之身居人成敗
之地急病讓醫固若此也兩端自見故熊未除今知東南
條蕩睢潼清復梁之喪師單輪不返擊援之期終當無日

勢窮路盡憂在滅亡事留變生將謀及已且彼軍殲殄江

淮屠酷禍源釁迹景變

疑作實

爲之上懼金陵君長致請設

二字疑

之責下思荆吳子弟法

疑

父兄之寬愚小猜驚將興

異計乘專任之機籍方面之重必當招結僭楚弱合無賴

內自封植外絕防禦因見信而類起出不疑以竊發事比

疾雷理同激矢上或憑陵乘

一作建

疾專擅縱橫下則鷓鴣時

淮肥覬覦叛換老疾姦回不虛然也而彼土區區厚加崇

納置之襟帶之方處以藩籬之所費金帛於烈火熬酒漿

於漏卮非乘景虛聲委其麥

疑作實

用夫量材授任必原其

始考行責成當存其大景豺聲蜂目之首狼心狐魅之徒

義無父子棄同即異捐親背德於我尚反目而去在梁則

何施可懷且我疑重傷心尾大不掉魚脫於淵義彰老氏

而假威凶險授柄姦回欲求肝膽之誠更啓危亡之兆固

智者不為迷者遂去若抽薪止沸剪草除根壺首囊頭义

手械足返國姦於司敗歸侵地於玄武非直惡之在今天

道人事實棄無禮苟達遠一作之者其長世何若悔非知罪

恭承德音且欲飛驛合符班師凱入悠悠水鄉有救其死

若乃執餽非之辨固遂過之失便當盡常勝之戰極必取

之攻飛江南渡深山將恐削壤卑名雖頓顙而不獲亡宗

滅廟望喬木而可悲昔田假英人於期壯一作莊非士窮而歸

我許以入懷景竦悖狗子攪亂四國庸可紆難棄若孤鷄

何足戀戀於亂臣勤勤於賊子也王者之威心疑厲如霜

電信同寒暑言猶麗天移至深念變通熟量可否幸思大
雅無貽後悔

為東魏與梁請和移文

元世俊

侍中大驃騎同尚書令武陽子元世俊梁移執事乃眷江

漢襟帶南土疆場相望交錯如繡韜軒未通革車屬起一

彼一此或利或鈍亡載得輿所獲蓋寡爭鷄失牛所損更

大空使干戈未戢一作不戎馬生郊髓腦塗於原野骸骨暴

於草澤二國不和百姓何罪靜言思之良所未悟我皇帝

以聖明啓運禮樂惟新澤漏原泉道光日月方欲寢榆關

之高峰罷輪臺之遠戍鑄劍戟為農器納蒼生於仁壽而

前益州刺史傅和往處西蕃逢時多難歸途一作中多阻流

寓江濱亦既來朝具陳彼意知以止戈在念去殺爲心留情灌瓜遲存通樂夙期所望實協虛想一作心猶恐失詞或垂其實眷言在茲佇聞良信至彼假節開遠軍李稜昔經旨若覆前言共敦隣好當拂逆旅以待行人

梁報東魏文

何敬容

侍中宣惠將軍尚書左僕射何敬容報魏執事成湯二十七征志難靜難軒轅五十二戰義在拯民既異時而同致信殊政而一揆豈其黷武以窮兵寧爲仗威而尊大我皇帝降茲仁一作上聖承彼百王負宸君臨不以四海爲貴冕旒日共常以百姓爲心同二儀以覆載一六合而光宅德

論義吳道通喜虞詩開闢之一君信典謨而莫擬均心彼

我等悅怨親物有常懷人無異念自北闕紛擾河洛沸騰

牝鷄索家蕭牆起釁事以集作似譚尚義以疑行類闕沉競一作

親尋干戈民無定主候馬泣師月陳庭廡累糧請救日填

關下單民有時雨之望遺黎興後后之悲誠感仁恕理惻

皇慈任好瓌瓌納二晉君小白區區存三亡國况我朝廷

寧忘拯救是以命師薄伐至於伊川雲旗屢張非爲翫武

鉦鼓載陳豈尚威力湯武不祀周有義兵匹夫是讐尺土

非利百戰百勝非善之善九拒九攻終勞率土納隍之慮

無忘寢食李陵失律催一作隨身晉陽獲彼來移聞見委曲

知魏當壁得人龜兆有主作相惟賢棟梁克一作克室欲偃

兵戎式敦隣好九臯既響喚天已聞銅山一啓靈鍾斯應
矧乃出其言善千里莫違嘉言孔昭良以收納且敵怨敵
惠不在後嗣亡羊補牢亦所未失移至一日輒以奏聞即
蒙詔可不爽來意行符一作非緣邊偃兵解甲庶烽一作燧火
不警邊亭息侯征夫捨刀斗之勤處婦無憤望之志尋常
不爭農桑是務分災恤患繼好息民稜在此歲久情無疑
難還使賫移報彼來懷

答魏初如移文

任孝恭

蓋聞軒轅五十二戰義在拯民湯武二十七征本惟靜難
明異時而同致信殊政而一揆我皇帝屈茲上聖承彼百
王卷六合而包含弘二儀而覆載照高日月澤畜一作畜

兩值魏氏紛綸函離星譽競尋干戈爭以興廢一作發

卒歲相不決辰隻馬泣師月陳庭闕累糧請救日欵關扉

故屢動震一作雲旗再驅蒼兕同小白之存亡等任好之繼

絕死婦是讐尺土非利然百戰百勝猶苦四民九拒九攻

終勞百姓納隍之念無忘日昃李陵以失律蹙摧鱗羽同

孟明之返秦似荀瑩之歸晉少展一作并賚來移文之委曲知

彼當壁得人兆龜有主欲偃兵戈式敦雅好鶴鳴九臯喚

天已響出其言善良以欣然輒勒緣邊屯戍各息烽警旌

旗畫卷刀斗夜停混鷄犬於四隣接桑麻於二境一作省

聚右二篇大同小異前篇加詳後篇見藝文類聚今英

華並收不欲去取內有同處止於後篇作白字

移齊河陽執事文

庾信

周天和四年四月二十七使將節車騎大將軍儀同三司
大都督陝西摠管府移齊河陽執事自疆場卧鼓邊鄙收
烽義讓之行未能暮月孔誠誨盜即值苞藏是以板載之
師須時而動自安封域非求拒防雖復風塵蹙接旗鼓無
侵五將即迴雙嶠已靜始奉朝旨獲被一作移書令受叛
城使迴軍實想彼邊司已奉處分既有此還輒須領納未
知何日可遣戍兵指附行人進能速報盟且不渝隣境相
善顧瞻原野幸甚實多故移

同前

周天和四年十一月十日陝州摠管長史梁昕移齊河陽

執事自拭玉繼書通關去傳實謂上方銷劍山陽息馬故
茲禦客或慢重尙屬彼司疆陰行善盜君一臣二上穆下
乖國家以邊鄙心搖須固備守大司馬齊國公天子介弟
中軍元帥駕馭孫吳驅馳貔虎舉因農隙義異城卽師巡
我境曾非反軛縮載之畢前旗已迴彼國兵馬不防殿後
餘塵遂之相接建旌一作疊上未及五申安鄴城傍先驚
七伏當時鋒刃或膏原野所獲彼將夏州刺史梁老首領
今以相還戶鄉不遠無令久客馬驢甲兵具條相勒封人
宜依領納宿無闕志不獲交綏致此埃塵誰階其咎故移
移虜留使文

年月朔日某官告配某州郡前本欲發遣彼使但某入境



卷651-卷700

以來國祥甫邇自秋迄冬未申欵接且狼星表邦嚴霜已
戒浮河亂濟長路苦寒時當獻歲惟新三元告慶珪贄盈
庭華裔叅軫式觀盛禮洽此嘉譙陽和旣動澤漸萬邦便
當遣使相隨永敦鄰睦故移

文苑英華卷第六百五十

